



07217

通志卷第七十七

宋 右 迪 功



漁 仲 撰

周同姓世家第一

吳 魯 燕 管 蔡 曹 衛 晉 鄭 魏

韓

吳

吳太伯太伯弟仲雍皆周太王之子而王季歷之兄也  
季歷賢而有聖子昌太王欲立季歷以及昌於是太伯  
仲雍二人乃奔荆蠻文身斷髮示不可用以避季歷季  
歷果立是為王季而昌為文王太伯之奔荆蠻自號句

通志

卷七

周同姓世家一

一

吳所居地名荆蠻義之從而歸者千餘家立為吳太伯太伯

卒無子弟仲雍立是為吳仲雍仲雍卒子季簡立季簡

卒子叔達立叔達卒子周章立是時武王克殷求太伯

仲雍之後得周章周章已君吳因而封之乃封周章弟

虞仲於周之北故夏虛是為虞仲列為諸侯周章卒子

熊遂立熊遂卒子柯相立柯相卒子彊鳩夷立彊鳩夷

卒子餘橋疑吾立餘橋疑吾卒子柯盧立柯盧卒子周

絲立周絲卒子屈羽立屈羽卒子夷吾立夷吾卒子禽

處立禽處卒子轉立轉卒子頗高立頗高卒子句畢立

是時晉獻公滅周北虞公以開晉伐虢也句畢卒子去

齊立去齊卒子壽夢立壽夢立而吳始益大稱王自太伯作吳五世而武王克殷封其後爲二其一虞在中國其一吳在夷蠻十二世而晉滅中國之虞中國之虞滅二世而夷蠻之吳興大凡從太伯至壽夢十九世王壽夢二年楚之亡大夫申公巫臣怨楚將子反而奔晉自晉使吳教吳用兵乘車令其子爲吳行人吳於是始通於中國遂伐楚十六年楚共王伐吳至衡山二十五年王壽夢卒壽夢有子四人長曰諸樊次曰餘祭次曰餘昧次曰季札季札賢而壽夢欲立之季札讓不可乃立諸樊攝行事當國王諸樊元年已除喪讓位季札季札固執不許吳人必欲立季札季札棄其室而耕國人舍之是歲秋吳伐楚楚敗我師四年晉平公立十三年王諸樊卒有命授弟餘祭欲傳以次必致國於季札而止以稱先王壽夢之意季札封於延陵故號曰延陵季子王餘祭三年齊相慶封有罪自齊來奔吳吳子慶封朱方之縣以爲奉邑以女妻之富於在齊四年吳使季札聘於魯請觀周樂季札審音知道觀舞知意使歌風自二南至于陳各知其俗使歌小雅知東遷之衰使歌大雅知文王之盛使歌頌知周殷魯盛德之所以同也見舞象與大武知西伯之猶有憾不如武王之極美也見

通志

卷七

周同姓世家一

二

舞韶護與大夏知成湯慙於始伐不如禹之勤於其身也見舞招箭則曰舜之德至矣大矣無以加矣去魯適齊知齊將有難謂晏平仲宜納邑與政去齊適鄭見子產如舊交去鄭適衛見蘧伯玉史魚等稱衛多君子去衛適晉及戚聞孫文子鐘聲譏其不宜爲樂至晉見趙文子韓宣子魏獻子悅之知三卿必柄晉國將去謂叔向曰晉政將有所歸吾子直必思自免於難語具季札傳中七年楚公子圍弑其王夾敖而代立是爲靈王十一年楚靈王會諸侯伐吳之朱方吳亦攻楚取三邑而去師敗走十七年王餘祭卒弟餘昧立王餘昧二年楚公子乘疾弑其君靈王代立焉四年王餘昧卒欲授弟季札季札讓逃去於是吳人乃立王餘昧之子僚爲王王僚二年公子光伐楚敗而亡王舟光懼襲楚復得王舟而還五年楚之亡臣伍子胥來奔公子光客之公子光者王諸樊之子也常以爲吾父兄弟四人當傳至季子季子卽不受國光父先立卽不傳季子光當立陰納賢士欲以襲王僚八年吳使公子光伐楚敗楚師迎楚故太子建母於居巢以歸因北伐敗陳蔡之師九年公子光伐楚拔居巢鍾離初楚邊邑卑梁氏之處女與吳邊

通志

楚志

周同姓世家一

三

邑之女爭桑二女家怒相滅兩國邊邑長聞之怒因而相攻滅吳之邊邑吳王怒故遂伐楚取兩都而去伍子胥之初奔吳說吳王僚以伐楚之利公子光曰胥之父兄爲僂於楚欲自報其仇耳未見其利於是伍員知光有他志乃求勇士專諸見之光喜乃客伍子胥子胥退而耕於野以待專諸之事十二年冬楚平王卒十三年春吳欲因楚喪而伐之使公子蓋餘燭庸以兵圍楚之六灑使季札於晉以觀諸侯之變楚發兵絕吳兵後吳兵不得還於是公子光曰此時不可失也告專諸曰不索何獲我真王嗣當立吾欲求之季子雖至不吾廢也

通志

卷七

周同姓世家一

四

專諸許之光因伏甲士窟室謁王僚飲使專諸置匕首於炙魚之中以進食遂刺殺王僚王僚死公子光竟代立爲王是爲吳王闔廬闔廬乃以專諸子爲卿季子至自晉曰苟先君無廢祀人民無廢主社稷有奉乃吾君也吾敢誰怨乎復命哭僚墓復位而待公子燭庸蓋餘二人將兵遇圍於楚者聞公子光弑王僚自立乃以其兵降楚楚封之於舒王闔廬元年舉伍子胥爲行人而與謀國事楚誅伯州犁其孫伯嚭亡奔吳吳以爲大夫三年吳王闔廬與子胥伯嚭將兵伐楚拔舒殺吳之二公子闔廬謀欲入郢將軍孫武以爲未可乃止四年伐

楚取六與澇五年伐越敗之六年楚使子常囊瓦伐吳迎而擊之大敗其軍於豫章取楚之居巢而還九年王闔廬用子胥孫武之謀與唐人蔡人西伐楚至於漢水楚亦發兵拒吳夾水陳吳王闔廬弟夫槩欲戰闔廬弗許夫槩曰王已屬臣兵兵以利爲上尙何待焉遂以其部五千人襲冒楚楚兵大敗走於是吳王遂縱兵追之比至郢五戰楚五敗楚昭王亡出郢奔鄖鄖公弟欲弒昭王昭王與鄖公奔隨而吳兵遂入郢子胥伯嚭鞭平王之尸以報父讎十年春越聞吳王之在郢國空乃伐吳吳使別兵擊越楚告急秦秦遣兵救楚擊吳吳師敗闔廬弟夫槩見秦越交敗吳吳王畱楚不去夫槩亡歸

通志

卷七

周同姓世家一

五

吳自立爲吳王闔廬聞之乃引兵歸攻夫槩夫槩敗奔楚楚昭王乃得以九月復入郢而封夫槩於堂谿爲堂谿氏十一年吳王使太子夫差伐楚取番楚恐而去郢徙都十五年孔子相魯十九年夏吳伐越越王句踐迎擊之音李越使死士挑戰三行造吳師呼自剄吳師觀之越因伐吳敗之姑蘇傷吳王闔廬指軍却七里吳王病傷而死闔廬使立太子夫差謂曰爾而忘句踐殺

汝父乎對曰不敢三年乃報越

闔廬家在吳縣昌門外名曰虎邱下池廣六十

步水深丈五尺銅棺三重瀕池六尺玉鳧之流扁諸之劍三千方員之口二千槩郢魚腸之劍在焉卒十萬餘

人治冢取土臨湖葬三日 王夫差元年以大夫伯嚭為  
白虎居其上故號曰虎邱

太宰習戰射常以報越為志二年吳悉精兵以伐越敗  
之夫椒報姑蘇也越王句踐乃以甲兵五千人栖於會  
稽使大夫種因吳太宰嚭而行成請委國為臣妾吳王  
將許之伍子胥諫曰昔有過氏殺斟灌以伐斟尋滅夏  
后帝相帝相之妃后緡方娠逃於有仍而生少康少康  
為有仍牧正有過又欲殺之少康奔有虞有虞思夏德  
於是妻以二女而邑之於綸有田一成有衆一旅後遂  
收夏衆撫其官職使人誘之遂滅有過氏復禹之績祀  
夏配天不失舊物今吳不如有過之彊而句踐大於少  
康今不因此而滅之又將寬之不亦難乎且句踐為人  
能辛苦今不滅後必悔之王不聽聽太宰嚭卒許越平  
與盟而罷兵去七年吳王夫差聞齊景公死而大臣爭  
寵新君弱乃興師北伐齊子胥諫曰句踐食不重味衣  
不重采弔死問疾且欲有所用其衆此人弗死必為吳  
患今越在腹心疾而王不先而務齊不亦謬乎弗聽遂  
北伐齊敗齊于艾陵至繪召魯哀公而徵百牢季康子  
使子貢以周禮說太宰嚭乃得止因畱賂地於齊魯之  
南九年為騶伐魯至與魯盟乃去十年因伐齊而歸十  
一年復伐齊越王句踐率其衆以朝吳厚獻遺之吳王

通志

卷七

周同姓世家一

六

喜惟子胥懼曰是參吳也諫曰越在腹心今得志於齊猶石田無所用且盤庚之誥有顛越勿遺商之以興吳王不聽使子胥於齊子胥屬其子於齊鮑氏還報吳王吳王聞之大怒賜子胥屬鏹之劍以死是歲也齊鮑氏弑齊悼公吳王聞之哭於軍門外三日乃從海上攻齊齊人敗吳吳王乃引兵歸十三年吳召魯衛之君會於臺臯十四年春吳王北會諸侯於黃池欲霸中國以全周室六月戊子越王句踐伐吳乙酉越五千人與吳戰丙戌虜吳太子友丁亥入吳吳人告敗於王夫差夫差惡其聞也或泄其語吳王怒斬七人於幕下七月辛丑吳王與晉定公爭長吳王曰於周室我爲長晉定公曰於姬姓我爲伯趙鞅怒將伐吳乃長晉定公吳王已盟與晉別欲伐宋太宰嚭曰可勝而不能居也乃引兵歸國國亡太子內空王居外久士皆罷敝於是乃使厚幣以與越平十五年齊田常弑簡公十八年越益疆越王句踐卒兵使伐敗吳於笠澤楚滅陳二十年越王句踐復伐吳二十一年遂圍吳二十三年十一月丁卯越敗吳越王句踐欲遷吳王夫差於甬東予百家居之吳王曰孤老矣不能事君王也吾悔不用子胥之言自令陷此乃自到死蔽其面曰吾無以見子胥也越王滅吳誅

通志

卷七

周同姓世家一

七

太宰嚭以爲不忠而歸

魯

周公旦者周武王弟也

周地爲其采邑故謂周公

自文王在時旦仁

孝加於羣子及武王卽位旦輔翼用事居多武王九年

東伐至盟津周公輔行十一年伐紂至牧野周公佐武

王作牧誓破殷入商宮已殺紂周公把大鉞召公把小

鉞以夾武王鬻社告紂之罪于天及殷民釋箕子之囚

封紂子武庚祿父使管叔蔡叔傅之以續殷祀徧封功

臣同姓戚者封周公旦於少昊之虛曲阜是爲魯公周

公不就封畱佐武王武王克殷二年天下未集武王有

通志

卷七

周同姓世家一

八

疾不豫羣臣懼太公召公乃繆卜周公曰未可以戚我

先王乃自以爲質設三壇周公北面立戴璧秉珪告于

太王王季文王史策祝曰惟爾元孫王發勤勞阻疾若

爾三王是有負子之責於天以旦代王發之身且巧能

多材多藝能事鬼神乃王發不如旦多材多藝不能事

鬼神乃命於帝庭數佑四方用能定汝子孫于下地四

方之民罔不敬畏無墜天之降葆命我先王亦永有所

依歸今我其卽命於元龜爾之許我我其以璧與珪歸

以俟爾命爾不許我我乃屏璧與珪周公已令史策告

太王王季文王欲代武王發於是乃卽三王而卜卜人

皆曰吉發書視之信吉周公喜開籒乃見書遇吉周公入賀武王曰王其無害且新受命三王惟長終是圖茲道能念予一人周公藏其策金滕匱中誠守者勿敢言明日武王有瘳其後武王既崩成王少在襁褓之中周公恐天下聞武王崩而畔周公乃踐阼代成王攝行政當國管叔及其羣弟流言於國曰周公將不利於成王周公乃告太公望召公奭曰我之所以弗辟而攝行政者恐天下畔周無以告我先王太王王季文王三王之憂勞天下久矣於今而後成武王蚤終成王少將以成周我所以爲之若此於是卒相成王而使其子伯禽代

通志

卷五

周同姓世家一

九

就封於魯周公戒伯禽曰我文王之子武王之弟成王之叔父我於天下亦不賤矣然我一沐三捉髮一飯三吐哺起以待士猶恐失天下之賢人子之魯慎無以國驕人管蔡武庚等果率淮夷而反周公乃奉成王命興師東伐而作大誥遂誅管叔殺武庚放蔡叔以收殷餘民以封康叔於衛封微子於宋以奉殷祀輯寧淮夷東土二年而畢定諸侯咸服宗周天降祉福康叔得禾異畝同穎獻之成王成王命唐叔以饋周公於東土作饋禾周公既受命禾嘉天子命作嘉禾東土以集周公歸報成王乃爲詩貽王命之曰鷓鴣王亦未敢訓周公成

王七年二月乙未王朝步自周至豐使太保召公先之洛相土其三月周公往營成周洛邑卜居焉曰吉遂朝之成王長能聽政於是周公乃還政於成王成王臨朝周公之代成王治南面倍依以朝諸侯及七年後還政成王北面就臣位匍匐如畏然初成王少時病周公乃自揃其蝨沈之河以祝於神曰王少未有識姦神命者乃旦也亦藏其策於府成王病有瘳及成王用事人或譖周公周公奔楚成王發府見周公禱書乃泣反周公周公歸恐成王壯治有所淫泆乃作多士作毋逸毋逸稱曰爲人父母爲業至長久子驕奢忘之以亡其家爲人子可不慎乎故昔在殷王中宗嚴恭敬畏天命自度治民震懼不敢荒寧故中宗享國七十五年其在高宗久勞于外爲與小人作其卽位乃有諒闇三年不言言乃驩不敢荒寧密靖殷國至于小大無怨故高宗享國五十五年其在祖甲不義惟王久爲小人于外知小人之依能保施小民不侮鰥寡故祖甲享國三十三年多士稱曰自成湯至于帝乙無不率祀明德帝無不配天者在今後嗣王紂誕淫厥佚不顧天及民之從也其民皆可誅至于文王日中昃不暇食故享國五十年作此以誠成王成王在豐天下已安周之官政未次序於是

通志

卷七

周同姓世家一

十

周公作周官官別其宜作立政以便百姓百姓說之周公在豐病將沒曰必葬我成周以明吾不敢離成王周公既卒成王亦讓葬周公於畢從文王以明予小子不敢臣周公也周公既卒後秋未穫暴風雷雨禾盡偃大木盡拔周國大恐成王與大夫朝服以開金縢之書王乃得周公所自以爲功代武王之說二公及王乃問史百執事史百執事曰信有昔周公命我勿敢言成王執書以泣曰自今後其無繆卜乎昔周公勤勞王家惟予沖人弗及知今天動威以彰周公之德惟朕小子其迎我國家禮亦宜之王出郊天乃雨反風禾盡起二公命

通志

卷七

周同姓世家一

七

邦人凡大木所偃盡起而築之歲則大熟於是成王乃命魯得郊祭文王魯有天子禮樂者以褒周公之德也周公卒子伯禽固已前受封是爲魯公伯禽之初受封之魯三年而後報政周公周公曰何遲也伯禽曰變其俗革其禮喪三年然後除之故遲太公亦封於齊五月而報政周公周公曰何疾也太公曰吾簡其君臣禮從其俗爲也及後聞伯禽報政遲乃歎曰嗚呼魯後世其北面事齊矣夫政不簡不易民不有近平易近民民必歸之伯禽卽位之後有管蔡等反也淮夷徐戎亦並興反於是伯禽率師伐之於胙作胙誓曰陳爾甲冑無敢

不善無敢傷牯馬牛其風臣妾逋逃勿敢越逐復之無  
敢寇攘逾牆垣魯人三郊三遂峙爾芻蕘糗糧楨榦無  
敢不逮我甲戌築而征徐戎無敢不及有大刑作此臆  
誓遂平徐戎定魯魯公伯禽卒子考公會立考公四年  
卒弟熙立是爲煬公煬公築茅闕門六年卒子幽公宰  
立幽公十四年幽公弟潰殺幽公而自立是爲魏公魏  
公五十年卒子厲公擢立厲公三十七年卒魯人立其  
弟具是爲獻公獻公三十二年卒子眞公濞立眞公十  
四年周厲王無道出奔虢共和行政二十九年周宣王  
卽位三十年眞公卒弟敖立是爲武公武公九年春武  
公與長子括少子戲西朝周宣王宣王愛戲欲立戲爲  
魯太子周之樊仲山甫諫宣王曰廢長立少不順不順  
必犯王命犯王命必誅之故出令不可不順也令之不  
行政之不立行而不順民將棄上夫下事上少事長所  
以爲順今天子建諸侯立其少是教民逆也若魯從之  
諸侯效之王命將所有壅若弗從而誅之是自誅王命  
也誅之亦失不誅亦失王其圖之宣王弗聽卒立戲爲  
魯太子夏武公歸而卒戲立是爲懿公懿公九年懿公  
兄括之子伯御與魯人攻弑懿公而立伯御爲君伯御  
卽位十一年周宣王伐魯殺其君伯御而問魯公子能

通志

卷七

周同姓世家一

七

道順諸侯者以爲魯侯樊穆仲曰魯懿公弟稱肅恭明  
神敬事耆老賦事行刑必問於遺訓而資於故實不干  
所問不犯所知宣王曰然能訓治其民矣乃立稱於夷  
宮是爲孝公自是諸侯多畔孝公二十五年諸侯畔周  
犬戎殺幽王秦始列爲諸侯二十七年孝公卒子弗湏  
立是爲惠公惠公三十年晉人弑其君昭侯四十五年  
晉人又弑其君孝侯四十六年惠公卒長庶子息攝當  
國行君事是爲隱公初惠公適夫人無子賤妾聲子生  
息息長爲娶於宋宋女至而好惠公奪而自妻之生子  
允登宋女爲夫人以允爲太子及惠公卒爲允少故魯  
人共令息攝政不言卽位隱公八年與鄭易祊及許田  
君子譏之十一年冬公子揮諂謂隱公曰百姓便君君  
其遂立吾請爲君殺子允君以我爲相隱公曰有先君  
命吾爲允少故攝代今允長矣吾方營菟裘之地而老  
焉以授子允政揮懼子允聞而反誅之乃反譖隱公於  
子允曰隱公欲遂立去子子其圖之請爲子殺隱公子  
允許諾十一月隱公祭鍾巫齊于社圃館于寯氏揮使  
人弑隱公子寯氏而立子允爲君是爲桓公桓公元年  
鄭以璧易天子之許田二年以宋之賂鼎入于太廟君  
子譏之三年使揮迎婦于齊爲夫人六年夫人生子與

通志

卷七

周同姓世家一

三

桓公同日故名曰同同長爲太子十六年會于曹伐鄭  
入厲公十八年春公將有行遂與夫人如齊齊襄公通  
桓公夫人公怒夫人夫人以告齊侯夏四月丙子齊襄  
公享公公醉使公子彭生抱魯桓公因命彭生招其脅  
公死於車魯人告于齊曰寡君畏君之威不敢寧居來  
修好禮禮成而不反無所歸咎請得彭生以除醜於諸  
侯齊人殺彭生以說魯立太子同是爲莊公莊公母夫  
人因留齊不敢歸魯莊公五年冬伐衛內衛惠公八年  
齊公子糾與召忽管仲來奔九年魯欲內子糾於齊後  
桓公桓公發兵擊魯魯急殺子糾召忽死之齊請魯生  
致管仲魯人施伯曰齊欲得管仲非殺之也將用之用  
之則爲魯患不如殺以其屍與之莊公不聽遂囚管仲  
與齊齊人相管仲十三年魯莊公與曹沫會齊桓公於  
柯曹沫劫齊桓公求魯侵地已盟而釋桓公欲背約管  
仲諫卒歸魯侵地十五年齊桓公始霸二十三年莊公  
如齊觀社三十三年初莊公築臺臨黨氏見孟女說而  
愛之許立爲夫人割臂以盟孟女生子斑斑長說梁氏  
女往觀圍人犖自牆外與梁氏女戲斑怒鞭犖莊公聞  
之曰犖有力焉遂殺之是未可鞭而置也斑未得殺會  
莊公有疾莊公有三弟長曰慶父次曰叔牙次曰季友

通志

卷七

周同姓世家一

五

莊公取齊女爲夫人曰哀姜哀姜無子哀姜娣曰叔姜生子開莊公無適嗣愛斑欲立之莊公病而問嗣於弟叔牙叔牙曰一繼一及魯之常也慶父在君何憂莊公病叔牙之言恐斑不得立以告季友季友請以死立斑遂以莊公命召叔牙鳩殺之語在季友傳中八月癸亥莊公卒季友竟立子斑爲君斑侍莊公喪舍于黨氏先時慶父與哀姜私通欲立哀姜娣子開及莊公卒而季友立斑十月己未慶父使圉人犇殺子班於黨氏季友奔陳慶父竟立莊公子開是爲湣公湣公二年慶父與哀姜通益甚哀姜與慶父謀殺湣公而立慶父慶父使通志

登老

周同姓世家一

五

卜齮襲殺湣公於武闈季友聞之自陳與湣公弟申如邾請魯求納之魯人欲誅慶父慶父恐奔莒於是季友奉子申入立之是爲釐公哀姜恐奔邾季友以賂如莒求慶父慶父歸使人殺慶父慶父請奔弗聽乃使大夫奚斯行哭而往慶父聞奚斯聲乃自殺齊桓公聞哀姜與慶父亂以危魯乃召之邾而殺之以其屍歸戮之魯而季友爲季氏謂之三桓焉釐公元年以汶陽鄆封季友季友爲相九年晉里克殺其君奚齊卓子齊桓公卒釐公討晉亂至高梁而還立晉惠公十七年齊桓公卒

二十四年晉文公卽位三十三年釐公卒子興立是爲  
文公文公元年楚太子商臣弑其父成王代立三年文  
公朝晉襄公十一年十月甲午魯敗翟于鹹獲長翟喬  
如富父終甥春其喉以戈殺之埋其首於子駒之門以  
命宣伯初宋武公之世鄭瞞伐宋司徒皇父帥師禦之  
以敗翟于長邱獲長翟緣斯晉之滅潞獲喬如弟焚如  
齊惠公二年鄭瞞伐齊齊王子城父獲其弟榮如埋其  
首於北門衛人獲其季弟簡如鄭瞞由是遂亡十五年  
季文子使於晉十八年二月文公卒文公有二妃長妃  
齊女哀姜生子惡及視次妃敬嬴嬖愛生子倭倭私事  
襄仲襄仲欲立之叔仲曰不可襄仲請齊惠公惠公新  
立欲親魯許之冬十月襄仲殺子惡及視而立倭是爲  
宣公哀姜歸齊哭而過市曰天乎襄仲爲不道殺適立  
庶市人皆哭魯人謂之哀姜魯由此公室卑三桓彊宣  
公倭十二年楚莊王彊圍鄭鄭伯降復國之十八年宣  
公卒子黑肱立是爲成公季文子曰使我殺適立庶失  
大援者襄仲襄仲立宣公公孫歸父有寵宣公欲去三  
桓與晉謀伐三桓會宣公卒季文子怨之歸父奔齊成  
公二年春齊伐取我隆夏公與晉郤克敗齊頃公於鞏  
齊復歸我侵地四年成公如晉晉景公不敬魯魯欲背

通志

卷七

周同姓世家一

五

晉合於楚或諫乃不十年成公如晉晉景公卒因留成  
公送葬魯諱之十五年始與吳王壽夢會鍾離十六年  
宣伯告晉欲誅季文子文子有義晉人弗許十八年成  
公卒子午立是爲襄公是時襄公三歲也襄公元年晉  
公悼立往年冬晉欒書弑其君厲公四年襄公朝晉五  
年季文子卒家無衣帛之妾廡無食粟之馬府無金玉  
以相三君君子曰季文子廉忠矣九年與晉伐鄭晉悼  
公冠襄公於衛季武子從相行禮十一年三桓氏分爲  
三軍十二年朝晉十六年晉平公卽位二十一年朝晉  
平公二十二年孔丘生二十五年齊崔杼弑其君莊公  
立其弟景公二十九年吳延陵季子使魯問周樂盡知  
其意魯人敬焉三十一年六月襄公卒其九月太子卒  
魯人立齊歸之子禰爲君是爲昭公昭公年十九猶有  
童心穆叔不欲立曰太子死有母弟可立不卽立長年  
鈞擇賢義鈞則卜之今禰非適嗣且又居喪意不在戚  
而有喜色若果立必爲季氏憂季武子弗聽卒立之比  
及葬三易衰君子曰是不終也昭公三年朝晉至河晉  
平公謝還之魯恥焉七年季武子卒八年楚靈王就章  
華臺召昭公昭公往賀賜昭公寶器已而悔復詐取之  
十二年朝晉至河晉平公謝還之十三年楚公子棄疾

通志

卷七

周同姓世家一

七

弑其君靈王代立十五年朝晉晉留之葬晉昭公魯恥之二十年齊景公與晏子狩竟因入魯問禮二十一年朝晉至河晉謝還之二十五年春鸚鵡來巢師已曰文成之世童謠曰鸚鵡來巢公在乾侯鸚鵡入處公在外野季氏與邠氏鬪雞季氏芥雞羽邠氏金距季平子怒而侵邠氏邠昭伯亦怒平子臧昭伯之弟會僞讒臧氏匿季氏臧昭伯囚季氏人季平子怒囚臧氏老臧邠氏以難告昭公昭公九月戊戌伐季氏遂入平子登臺請曰君以讒不察臣罪誅之請遷沂上弗許請囚於鄆弗許請以五乘亡弗許子家駒曰君其許之政自季氏久

通志

卷七

周同姓世家一

六

矣爲徒者衆衆將合謀弗聽邠氏曰必殺之叔孫氏之臣戾謂其衆曰無季氏與有就利皆曰無季氏是無叔孫氏戾曰然救季氏遂敗公師孟懿子聞叔孫氏勝亦殺邠昭伯昭伯爲公使故孟氏得之三家共伐公公遂奔己亥公至于齊齊景公曰請致千社待君子家曰棄周公之業而臣於齊可乎乃止子家曰齊景公無信不如早之晉弗從叔孫見公還見平子平子頓首初欲迎昭公孟孫季孫後悔乃止二十六年春齊伐魯取鄆而居昭公焉夏齊景公將內公令無受魯賂申豐汝賈許齊臣高斲子將粟五千庾子將言於齊侯曰羣臣不能

事魯君有異焉宋元公爲魯如晉求內之道卒叔孫昭子求內其君無病而死不知天棄魯乎抑魯君有罪于鬼神也願君且待景公從之二十八年昭公如晉求入季平子私於晉六卿六卿受季氏賂諫晉君晉君乃止居昭公乾侯二十九年昭公如鄆齊景公使人賜昭公書自謂主君昭公恥之怒而去乾侯三十一年晉欲內昭公召季平子平子因六卿謝罪六卿爲言曰晉欲內昭公衆不從晉人止三十二年昭公卒於乾侯魯人共立昭公弟宋爲君是爲定公定公立趙簡子問史墨曰季氏亡乎史墨對曰不亡季友有大功於魯受鄆爲上

通志

卷五

周同姓世家一

七

卿至于文子武子世增其美魯文公卒東門遂殺適立庶魯君於是失國政政在季氏於今四君矣民不知君何以得國是以爲君慎器與名不可以假人定公五年季平子卒陽虎私怒囚季桓子與盟乃舍之七年齊伐我取鄆以爲魯陽虎邑以從政八年陽虎欲盡殺三桓適而更立其所善庶子以代之載季桓子將殺之桓子詐而得脫三桓共攻陽虎陽虎居陽關九年魯伐陽虎陽虎奔齊已而奔晉趙氏十年定公與齊景公會於夾谷孔子行相事齊欲襲魯君孔子以禮歷階誅齊淫樂齊侯懼乃止歸魯侵地而謝過十二年使仲由毀三桓

城收其甲兵孟氏不肯墮成伐之不克而止季桓子受齊女樂孔子去十五年定公卒子將立是爲哀公哀公五年齊景公卒六年齊田乞弑其君孺子七年吳王夫差彊伐齊至繪徵百牢於魯季康子使子貢說吳王及太宰嚭以禮誑之吳王曰我文身不足責禮乃止八年吳爲鄒伐魯至城下盟而去齊伐我取三邑十年伐齊南邊十一年齊伐魯季氏用冉有有功思孔子孔子自衛反魯十四年齊田恆弑其君簡公於徐州孔子請伐之哀公不聽十五年使子服景伯子貢爲介適齊齊歸我侵地田恆初相欲親諸侯明年孔子卒二十二年越

通志

卷七

周同姓世家一

五

王句踐滅吳王夫差二十七年春季康子卒夏哀公患三桓將欲因諸侯以劫之三桓亦患公之作難故君臣多閒公游于陵陂遇孟武伯於衢曰請問余及死乎對曰不知也公欲以越伐三桓八月哀公如陘氏三桓攻公公奔于衛去如鄒遂如越國人迎哀公復歸卒于有山氏子寧立是爲悼公悼公之時三桓勝魯如小侯卑於三桓之家十三年三晉滅智伯分其地而有之三十七年悼公卒子嘉立是爲元公元公二十一年卒子顯立是爲穆公穆公三十三年卒子奮立是爲共公共公二十二年卒子屯立是爲康公康公九年卒子匱立是

爲景公景公二十九年卒子叔立是爲平公是時六國皆稱王平公十二年秦惠王卒二十二年平公卒子賈立是爲文公文公七年楚懷王死于秦二十三年文公卒子離立是爲傾公傾公二年秦拔楚之郢楚傾王東徙于陳十九年楚伐我取徐州二十四年楚考烈王伐滅魯傾公亡遷於卞邑爲家人魯絕祀傾公卒于柯魯起周公至傾公凡三十四世

燕

召公奭與周同姓姓姬氏周武王之滅紂封召公於北燕其在成王時召公爲三公自陝以西召公主之自陝

通志

卷七

周同姓世家一

三

以東周公主之成王旣幼周公攝政當國踐阼召公疑之作君奭君奭不說周公周公乃稱湯時有伊尹假于皇天在大戊時則有若伊陟臣扈假于上帝巫咸治王家在祖乙時則有若巫賢在武丁時則有若甘般率維茲有陳保又有殷於是召公乃說召公之治西方甚得兆民和召公巡行鄉邑有棠樹決獄政事其下自侯伯至庶人各得其所無失職者召公卒而民思召公之政懷棠樹不敢伐歌詠之作甘棠之詩自召公以下至惠侯惠侯當周厲王奔虜共和之時惠侯卒子釐侯立是歲周宣王初卽位釐侯二十一年鄭桓公初封於鄭三

十六年釐侯卒子頃侯立頃侯二十年周幽王淫亂爲  
犬戎所弑秦始列爲諸侯二十四年頃侯卒子哀侯立  
哀侯二年卒子鄭侯立鄭侯三十六年卒子繆侯立繆  
侯七年而魯隱公元年也十八年卒子宣侯立宣侯十  
三年卒子桓侯立桓侯七年卒子莊公立莊公十二年  
齊桓公始霸十六年與宋衛共伐周惠王惠王出奔溫  
立惠王弟頹爲周王十七年鄭執燕仲父而內惠王于  
周二十七年山戎來侵我齊桓公救燕遂北伐山戎而  
還燕君送桓公出境桓公割燕所至地予燕使燕共貢  
天子如成周時職使燕復修召公之法三十三年卒襄

通志

卷七

周同姓世家一

五

公立襄公二十六年晉文公爲踐土之會稱伯三十一  
年秦師敗于殽三十七年秦穆公卒四十年襄公卒桓  
公立桓公十六年卒宣公立宣公十五年卒昭公立昭  
公十三年卒武公立是歲晉滅三郤大夫武公十九年  
卒文公立文公六年卒懿公立懿公元年齊崔杼弑其  
君莊公四年卒子惠公立惠公元年齊高止來奔六年  
惠公多寵姬公欲去諸大夫而立寵姬宋大夫共誅姬  
宋惠公懼奔齊四年齊高偃如晉請共伐燕入其君晉  
平公許與齊伐燕入惠公惠公至燕而死燕立悼公七  
年卒共公立共公五年卒平公立晉公室卑六卿始彊

大平公十八年吳王闔廬破楚入郢十九年卒簡公立  
簡公十二年卒獻公立晉趙鞅圍范中行於朝歌獻公  
十二年齊田恆弑其君簡公十四年孔子卒二十八年  
獻公卒孝公立孝公十二年韓趙魏滅智伯分其地三  
晉疆十五年孝公卒成公立成公十六年卒湣公立湣  
公三十一年卒釐公立是歲三晉列爲諸侯釐公三十  
年伐齊敗于林營釐公卒桓公立桓公十一年卒文公  
立是歲秦獻公卒秦益疆文公十九年齊威王卒二十  
八年蘇秦始見說文公文公予車馬金帛以至趙趙肅  
侯用之因約六國爲從長秦惠王以其女爲燕太子婦

通志

卷七

周同姓世家一

三

二十九年文公卒太子立是爲易王易王初立齊宣王  
因燕喪伐我取十城蘇秦說齊使復歸燕十城十年燕  
君爲王蘇秦與燕文公夫人私通懼誅乃說王使齊爲  
反間欲以亂齊易王立十二年卒子燕噲立燕噲旣立  
齊人殺蘇秦蘇秦之在燕與其相子之爲婚而蘇代與  
子之交及蘇秦死而齊王復用蘇代燕噲三年與楚三  
晉攻秦不勝而還子之相燕貴重主斷蘇代爲齊使於  
燕燕王問曰齊王何如對曰必不霸燕王曰何也對曰  
不信其臣蘇代欲以激燕王以尊子之也於是燕王大  
信子之子之因遺蘇代百金而聽其所使鹿毛壽謂燕

王不如以國讓相子之人之謂堯賢者以其讓天下於許由許由不受有讓天下之名而實不失天下今王以國讓於子之子之必不敢受是王與堯同行也燕王因屬國於子之子之大重或曰禹薦益已而以啓人爲吏及老而以啓爲不足任乎天下傳之於益已而啓與交黨攻益奪之天下謂禹名傳天下於益已而實令啓自取之今王言屬國於子之而吏無非太子人者是名屬子之而實太子用事也王因收印自三百石吏以上而效之子之子之南面行王事而噲老不聽政顧爲臣國事皆決於子之三年國大亂百政惘恐將軍市被與太

通志

卷七

周同姓世家一

五

子平謀將攻子之諸將謂齊湣王曰因而赴之破燕必矣齊王因令人謂太子平曰寡人聞太子之義將廢私而立公飭君臣之義明父子之位寡人之國小不足以爲先後雖然則唯太子所以令之太子因要黨聚衆將軍市被圍公宮攻子之不克將軍市被及百姓反攻太子平將軍市被死以徇因構難數月死者數萬衆人恫恐百姓離志孟軻乃謂齊王曰今伐燕此文武之時不可失也齊王因令章子將五都之兵以因北地之衆以伐燕士卒不戰城門不閉燕君噲死大齊勝燕子之亡二年而燕人共立太子平是爲昭王昭王於破燕之後

卽位卑身厚幣以招賢者謂郭隗曰齊因孤之國亂而  
襲破燕孤極知燕小力少不足以報然誠得賢士以共  
國以雪先王之恥孤之願也先生視可者得身事之郭  
隗曰王必欲致士先從隗始况賢於隗者豈遠千里哉  
於是昭王爲隗改築宮而師事之樂毅自魏往鄒衍自  
齊往劇辛自趙往士爭趨燕燕王弔死問孤與百姓同  
甘苦二十八年燕國殷富士卒樂軼輕戰於是遂以樂  
毅爲上將軍與秦楚三晉合謀以伐齊齊兵敗潘王出  
亡於外燕兵獨追北入至臨菑盡取齊寶燒其宮室宗  
廟齊城之不下者獨唯聊莒卽墨其餘皆屬燕六歲昭

通志

卷七

周同姓世家一

五

王三十三年卒子惠王立惠王爲太子時與樂毅有隙  
及卽位疑毅使騎劫代將樂毅亡走趙齊田單以卽墨  
擊敗燕軍騎劫死燕兵引歸齊悉復得其故城潘王死  
于莒乃立其子爲襄王惠王七年卒韓魏楚共伐燕燕  
武成王立武成王七年齊田單伐我拔中陽十三年秦  
敗趙於長平阬其卒四十餘萬十四年武成王卒子孝  
王立孝王元年秦圍邯鄲者解去三年卒子王喜立王  
喜之四年秦昭王卒燕王命相栗腹約歡於趙以五百  
金爲趙王酒還報燕王曰趙王壯者皆死長平其孤未  
壯可伐也王召昌國君樂閒問之對曰趙四戰之國其

民習兵不可伐王曰吾以五而伐一對曰不可燕王怒羣臣皆以爲可卒起二軍車二千乘粟腹將而攻鄗卿秦攻代唯獨大夫將渠謂燕王曰與人通關約交以五百金飲人之王使者報而反攻之不祥兵無成功燕王不聽自將偏軍隨之將渠引王綏止之曰王必無自往往無成功王蹴之以足將渠泣曰臣非以自爲爲王也燕軍至宋子趙使廉頗將擊破粟腹於鄗破卿秦樂乘於代樂閒奔趙廉頗逐之五百餘里圍其國燕人請和趙人不許必令將渠處和燕相將渠以處和趙聽將渠解燕圍六年秦滅東西周置三川郡七年秦拔趙榆次

通志

卷七

周同姓世家一

三

三十七城秦置太原郡九年秦王政卽位十年趙使廉頗將攻繁陽拔之趙孝成王卒悼襄王立使樂乘代廉頗廉頗不聽攻樂乘樂乘走廉頗奔大梁十二年趙使李牧攻燕拔武遂方城劇辛故居趙與龐煖善已而亡走燕燕見趙數困于秦而廉頗去令龐煖將也欲因趙弊攻之間劇辛辛曰龐煖易與耳燕使劇辛將擊趙趙使龐煖擊之取燕軍二萬殺劇辛秦拔魏二十城置東郡十九年秦拔趙之鄴九城趙悼襄王卒二十三年太子丹質於秦亡歸燕二十五年秦虜滅韓王安置潁川郡二十七年秦虜趙王遷滅趙趙公子嘉自立爲代王

燕見秦且滅六國秦兵臨易水禍且至燕太子丹陰養壯士二十人使荆軻獻督亢地圖於秦因襲刺秦王秦王覺殺軻使將軍王翦擊燕二十九年秦攻拔我薊燕王亡徙居遼東斬丹獻秦三十年秦滅魏三十三年秦拔遼東虜燕王喜卒滅燕是歲秦將王賁亦虜代王嘉

### 管蔡

管叔鮮蔡叔度者周文王子而武王弟也武王同母兄弟十人母曰太妣文王正妃也其長子曰伯邑考次曰武王發次日曰管叔鮮次日曰周公旦次日曰蔡叔度次日曰曹叔振鐸次日曰成叔武次日曰霍叔處次日曰康叔封次日曰冉

通志

卷七

周同姓世家一

五

季載冉季載最少同母兄弟十人唯發旦賢左右輔文王故文王舍伯邑考而以發爲太子及文王崩而發立是爲武王伯邑考旣已前卒矣武王已克殷紂平天下封功臣昆弟於是封叔鮮於管管在滎陽封叔度於蔡上二蔡

人相紂子武庚祿父治殷遺民封叔旦於魯而相周爲周公封叔振鐸於曹封叔武於成封叔處於霍康叔封冉季載皆少未得封武王旣崩成王少周公旦專王室

管叔蔡叔疑周公之爲不利於成王乃挾武庚以作亂周公旦承成王命伐誅武庚殺管叔而放蔡叔遷之與車十乘徒七十人從而分殷民爲二其一封微子啓於

宋以續殷嗣其一封康叔爲衛君是爲衛康叔封季載於冉冉季康叔皆有馴行於是周公舉康叔爲周司寇冉季爲周司空以佐成王治皆有令名於天下蔡叔度既遷而死其子曰胡胡乃改行率德馴善周公聞之而

舉胡以爲魯卿士魯國治於是周公言於成王復封胡

於蔡胡徙新蔡以奉蔡叔之祀是爲蔡仲餘五叔皆就國無

爲天子吏者蔡仲卒子蔡伯荒立蔡伯荒卒子宮侯立

宮侯卒子厲侯立厲侯卒子武侯立武侯之時周厲王

失國奔虢共和行政諸侯多叛周武侯卒子夷侯立夷

侯十一年周宣王卽位二十八年夷侯卒子釐侯所事

通志

卷五

周同姓世家一

五

立釐侯三十九年周幽王爲犬戎所殺周室卑而東遷

秦始得列爲諸侯四十八年釐侯卒子共侯興立共侯

二年卒子戴侯立戴侯十年卒子宣侯措父立宣侯二

十八年魯隱公初立三十五年宣侯卒子桓侯封人立

桓侯三年魯弑其君隱公二十年桓侯卒弟哀侯獻舞

立哀侯十一年初哀侯娶陳息侯亦娶陳息夫人將歸

過蔡蔡楚不敬息侯怒請楚文王來伐我我求救於蔡

蔡必來楚因擊之可以有功楚文王從之虜蔡哀侯以

歸哀侯留九歲死於楚凡立二十年卒蔡人立其子肸

是爲繆侯繆侯以其女弟爲齊桓公夫人十八年齊桓

公與蔡女戲船中夫人蕩舟桓公止之不止公怒歸蔡女而不絕也蔡侯怒嫁其弟齊桓公怒伐蔡蔡潰遂虜繆侯南至楚邵陵已而諸侯爲蔡謝齊齊侯二十九年繆侯卒子莊侯甲午立莊侯二年齊桓公卒十四年晉文公敗楚於城濮二十年楚太子商臣弑其父成王代立二十五年秦穆公卒三十三年楚莊王卽位三十四年莊侯卒子文侯申立文侯十四年楚莊王伐陳殺夏徵舒十五年楚圍鄭鄭降楚楚復釋之二十年文侯卒子景侯同立景侯元年楚莊王卒二十九年景侯爲太子般娶婦於楚而景侯通焉太子弑景侯而自立是爲

通志

楚志

周同姓世家一

五

靈侯靈侯二年楚公子圍弑其君郝敖以自立是爲靈王九年陳司徒招弑其君哀公楚使公子棄疾滅陳而有之十二年楚靈王以靈侯弑其父誘蔡靈侯於申伏甲飲之醉而殺之刑其士卒七十人令公子棄疾圍蔡十一月滅蔡使棄疾爲蔡公楚滅蔡三歲楚公子棄疾弑其君靈王代立爲平王平王乃求蔡景侯少子廬立之是爲平侯是年楚亦復立陳楚平王初立欲親諸侯故復立陳蔡後平侯九年卒靈侯般之孫東國攻平侯子而自立是爲悼侯悼侯父曰隱太子友者靈侯之太子平侯立而殺隱太子故平侯卒隱太子之子東國攻

平侯子而代立是爲悼侯悼侯三年卒弟昭侯申立昭侯十年朝楚昭王持美裘二獻其一昭王而白衣其一楚相子常欲之不與子常讒蔡侯畱之楚三年蔡侯知之乃獻其裘於子常子常受之乃言歸蔡侯蔡侯歸而之晉請與晉伐楚十三年春與衛靈公會邵陵蔡侯私於周襄弘以求長於衛衛使史鮪言康叔之功德乃長衛夏爲晉滅沈楚怒攻蔡蔡昭侯使其子爲質於吳以共伐楚冬與吳王闔廬遂破楚入郢蔡怨子常子常恐奔鄭十四年吳去而楚昭王復國十六年楚令尹爲其民泣以謀蔡蔡昭侯懼二十六年孔子如蔡楚昭王伐蔡蔡恐告急於吳吳爲蔡遠約遷以自近易以相救昭侯私許不與大夫計吳人來救蔡因遷蔡於州來二十八年昭侯將朝於吳大夫恐其復遷乃令賊利殺昭侯已而誅賊利以解過而立昭侯子朔是爲成侯成侯四九年宋滅曹十年齊田恆弑其君簡公十三年楚滅陳十四年成侯卒子聲侯產立聲侯十五年卒子元侯立元侯六年卒子侯齊立侯齊立四年楚惠王滅蔡蔡侯齊亡蔡遂絕祀後陳滅三十三年

伯邑考其後不知所封武王發其後爲周管叔鮮作亂誅死無後周公旦其後爲魯蔡叔度其後爲蔡曹叔振

通志

卷七

周同姓世家一

三

鐸其後爲曹成叔武其後世無所見霍叔處其後晉獻公時滅霍康叔封其後爲衛冉季載其後世無所見周有本紀言魯蔡曹衛有世家言

曹

曹叔振鐸周武王弟也武王已克殷紂封叔振鐸於曹叔振鐸卒子太伯脾立太伯卒子仲君平立仲君平卒子宮伯侯立宮伯侯卒子孝伯雲立孝伯雲卒子夷伯喜立夷伯二十三年周厲王奔於虢三十年卒弟幽伯彊立幽伯九年弟蘇殺幽伯代立是爲戴伯戴伯元年周宣王已立三歲三十年戴伯卒子惠伯兕立惠伯二

通志

卷五

周同姓世家一

三

十五年周幽王爲犬戎所殺因東徙益卑諸侯畔之秦始列爲諸侯三十六年惠伯卒子石甫立其弟武殺之代立是爲繆公繆公三年卒子桓公終生立桓公三十五年魯隱公立四十五年魯弑其君隱公四十六年宋華父督弑其君殤公及孔父五十五年桓公卒子莊公夕姑立莊公二十三年齊桓公始霸三十一年莊公卒子釐公夷立釐公九年卒子昭公瑛立昭公六年齊桓公敗蔡遂至楚召陵九年昭公卒子共公襄立共公十六年初晉公子重耳其亡過曹曹君無禮欲觀其駢脅釐負羈諫不聽私善於重耳二十一年晉文公重耳伐

曹虜共公以歸令軍母入僖負羈之宗族聞或說文公曰昔齊桓公會諸侯復異姓今君囚曹君滅同姓何以令於諸侯晉乃復歸共公二十五年晉文公卒三十五年共公卒子文公壽立文公二十三年卒子宣公彊立宣公十七年卒弟成公負芻立成公三年晉厲公伐曹虜成公以歸已復釋之五年晉欒書中行偃使程滑弑其君厲公二十三年成公卒子武公勝立武公二十六年楚公子棄疾弑其君靈王代立二十七年武公卒子平公頃立平公四年卒子悼公午立是歲宋衛陳鄭皆火悼公八年宋景公立九年悼公朝於宋宋囚之曹立

通志

卷七

周同姓世家一

三

其弟野是爲聲公悼公死於宋歸葬聲五公年平公弟通弑聲公代立是爲隱公隱公四年聲公弟露弑隱公代立是爲靖公靖公四年卒子伯陽立伯陽三年國人有夢衆君子立於社宮謀欲亡曹曹叔振鐸止之請待公孫彊許之且求之曹無其人夢者戒其子曰我亡爾聞公孫彊爲政必去曹無罹曹禍及伯陽卽位好田弋之事六年曹野人公孫彊亦好田弋獲白鴈而獻之且言田弋之說因訪政事伯陽大說之使爲司城以聽政夢者之子乃亡去公孫彊言霸說於曹伯十四年曹伯從之乃背晉于宋宋景公伐之晉人不救十五年宋滅

曹執伯陽及公孫彊以歸而殺之曹遂絕其祀

衛

衛康叔名封周武王同母少弟也其次尚有冉季冉季最少武王已克殷紂復以餘民封紂子武庚祿父比諸侯以奉其先祀勿絕爲武庚未集恐其有賊心武王乃令其弟管叔蔡叔傅相武庚祿父以和其民武王既崩成王少周公旦代成王治當國管叔蔡叔疑周公乃與武庚祿父作亂欲攻成周周公以成王命興師伐殷殺武庚祿父管叔放蔡叔以武庚餘民封康叔爲衛君居河淇閒故商墟周公旦懼康叔齒少乃申告康叔曰

通志

卷七

周同姓世家一

三

以求殷之賢人君子長者問其先殷所以興所以亡而務愛民告以紂所以亡者以淫於酒酒之失婦人是用故紂之亂自此始爲梓材示君子可法則故謂之康誥酒誥梓材以命之康叔之國旣以此命能和集其民民乃說成王長用事舉康叔爲周司寇賜衛寶祭器以章有德康叔卒子康伯代立康伯卒子考伯立考伯卒子嗣伯立嗣伯卒子廋伯立廋伯卒子靖伯立靖伯卒子貞伯立貞伯卒子頃侯立頃侯厚賂周夷王夷王命衛爲侯頃侯立十二年卒子釐侯立釐侯十三年周厲王

出奔於衛共和行政焉二十八年周宣王立四十二年

釐侯卒太子共伯餘立爲君共伯之弟和有寵於釐侯多與之賂和以其賂賂士以襲攻共伯於墓上共伯入釐侯羨自殺衛人因葬之釐侯旁諡曰共伯而立和爲衛侯是爲武公武公卽位能修康叔之政百姓和集四十二年犬戎殺周幽王武公將兵往佐周平戎有功周平王命武公爲公五十五年卒子莊公揚立莊公五年娶齊女爲夫人好而無子又娶陳女爲夫人生子早死陳女女弟亦幸於莊公生子完完母死莊公令夫人齊女子之立爲太子莊公有寵妾生子州吁長而好兵莊公使將石碯諫莊公曰庶子好兵使將亂自此起不聽

通志

卷七

周同姓世家一

七

二十三年莊公卒太子完立是爲桓公桓公三年州吁驕奢桓公黜之州吁出奔十三年鄭伯弟段攻其兄不勝亡而州吁求與之友十六年州吁收聚衛亡人以襲殺桓公州吁自立爲衛君爲鄭伯弟段欲伐鄭請宋陳蔡與俱三國皆許州吁州吁新立好兵弑桓公衛人皆不愛石碯乃因桓公母家於陳佯爲善州吁至鄭郊石碯與陳侯共謀使右宰醜進食因殺州吁於濮而迎桓公弟晉於邠而立之是爲宣公宣公七年魯弑其君隱公九年宋督弑其君殤公及孔父十年晉沃曲莊伯弑其君哀侯十八年初宣公愛夫人夷姜夷姜生子伋以

爲太子而令右公子傅之右公子爲太子娶齊女未入室而宣公見所欲爲太子婦者好說而自取之更爲太子取他女宣公得齊女生子壽子朔令左公子傅之太子佞母死宣公正夫人與朔共讒惡太子佞宣公自以奪太子妻也心惡太子欲廢之及聞其惡大怒乃使太子佞於齊而令盜遮界上而殺之與太子白旄而告界盜見持白旄者殺之且行子朔之兄壽太子異母弟也知朔之惡太子而君欲殺之謂太子曰界盜見太子白旄卽殺太子太子可毋行太子曰逆父命求生不可遂行壽見太子不止乃盜其白旄先馳至界界盜見其驗

通志

楚書

周同姓世家一

三

卽殺之壽已死而太子佞又至謂盜曰所當殺乃我也盜并殺太子佞以報宣公宣公乃以朔爲太子十九年宣公卒太子朔立是爲惠公惠公四年左右公子怨惠公之讒殺前太子佞而代立乃作亂攻惠公立太子佞之弟黔牟爲君惠公奔齊衛君黔牟立八年齊襄公率諸侯奉王命共伐衛內衛惠公誅左右公子黔牟奔於周惠公復立惠公立三年出亡亡八年復入與前通年凡十年矣二十五年惠公怨周容舍黔牟與燕伐周周惠王奔溫衛燕立惠王弟頹爲王二十九年鄭復內惠王三十一年惠王卒子懿公赤立懿公卽位好鶴淫樂

奢侈九年翟伐衛衛懿公欲發兵兵或畔大臣言曰君好鶴鶴可令擊翟翟於是遂入殺懿公懿公之立也百姓大臣皆不服自懿公父惠公朔之讒殺太子伋代立至於懿公常欲敗之卒滅惠公之後而更立黔牟之弟昭伯頑之子申爲君是爲戴公戴公申元年卒齊桓公乃率諸侯伐翟爲衛築楚邱立戴公弟燬爲君是爲文公文公以亂故奔齊齊人入之文公初立輕賦平罪身自勞與百姓同苦以收衛民十六年晉公子重耳過無禮十七年齊桓公卒二十五年文公卒子成公鄭立成公三年晉欲假道於衛救宋成公不許晉更從南河渡

通志

卷七

周同姓世家一

五

救宋徵師於衛衛大夫欲許成公不肯大夫元咺攻成公成公出奔晉文公重耳伐衛分其地予宋討前過無禮及不救宋患也衛成公遂出奔陳二歲如周求入與晉文公會晉使人鳩成公成公私於周主鳩令薄得不死已而周爲請晉文公卒人之衛而誅元咺衛君瑕出奔七年晉文公卒十三年成公朝晉襄公十四年秦穆公卒二十六年齊酈歃殺其君懿公三十五年成公卒子穆公遯立穆公二年楚莊王伐陳殺夏徵舒三年楚莊王圍鄭鄭降復釋之十一年孫良夫救魯伐齊復得侵地穆公卒子定公臧立定公十二年卒子獻公衍立

獻公十三年公令師曹教宮妾鼓琴妾不善曹笞之妾以幸惡曹於公公亦笞曹三百十八年獻公戒孫文子甯惠子食皆往日旰不召而去射鴻於圃二子從之公不釋射服與之言二子怒如宿孫文子數侍公飲使師曹歌巧言之卒章師曹又怒公之嘗笞三百乃歌之欲以怒孫文子報衛獻公文子語蘧伯玉伯玉曰臣不知也遂攻出獻公獻公奔齊齊置獻公於聚邑孫文子甯惠子共立定公弟秋爲君是爲殤公殤公秋立封孫文子林父於宿十二年甯喜與孫文子爭寵相惡殤公使甯喜攻孫林父林父奔晉復求入故衛獻公獻公在齊齊景公聞之與衛獻公如晉求入晉爲伐衛誘與盟衛殤公會晉公平公平公執殤公與甯喜而復入衛獻公獻公亡在外十二年而入獻公後元年誅甯喜三年吳延陵季子使過衛見蘧伯玉史鮪曰衛多君子其國無故過宿孫林父爲擊磬曰不樂音太悲使衛亂乃此矣是年獻公卒子襄公惡立襄公六年楚靈王會諸侯襄公稱病不往九年襄公卒初襄公有賤妾幸之有身夢有人謂曰我康叔也令若子必有衛名而子曰元妾怪之問孔成子成子曰康叔者衛祖也及生子男也以告襄公襄公曰天所置也名之曰元襄公夫人無子於是乃

通志

卷七

周同姓世家一

七

立元爲太子是爲靈公靈公五年朝晉昭公六年楚公子棄疾弑靈王自立爲平王十一年火三十八年孔子來祿之如魯後有隙孔子去後復來三十九年太子蒯瞶與靈公夫人南子有惡欲殺南子蒯瞶與其徒戲陽邈謀朝使殺夫人戲陽後悔不果蒯瞶數目之夫人覺之懼呼曰太子欲殺我靈公怒太子蒯瞶奔宋已而之晉趙氏四十二年春靈公遊於郊令子郢僕郢靈公少子也字子南靈公怨太子出奔謂郢曰我將立若爲後郢對曰郢不足以辱社稷君更圖之夏靈公卒夫人命子郢爲太子曰此靈公命也郢曰亡人太子蒯瞶之子

通志

卷七

周同姓世家一

五

輒在也不敢當於是衛乃以輒爲君是爲出公六月乙酉趙簡子欲入蒯瞶乃令陽虎詐命衛十餘人衰經歸簡子送蒯瞶衛人聞之發兵擊蒯瞶蒯瞶不得入入宿而保衛人亦罷兵出公輒四年齊田乞弑其君孺子八年齊鮑子弑其君悼公孔子自陳入衛九年孔文子問兵於仲尼仲尼不對其後魯迎仲尼仲尼反魯十二年初孔圉文子取太子蒯瞶之姊生悝孔氏之豎渾良夫美好孔文子卒良夫通於悝母太子在宿悝母使良夫於太子太子與良夫言曰苟能入我國報子以乘軒免子三死母所與與之盟許以悝母爲妻閏月良夫與太

子入舍孔氏之外圃昏二人蒙衣而乘宦者羅御如孔氏孔氏之老樂甯問之稱姻妾以告遂入適伯姬氏既食俚母仗戈而先太子與五人介輿殺從之伯姬劫俚於廁彊盟之遂劫以登臺樂甯將飲酒炙未熟聞亂使告仲由召護駕乘車行爵食炙奉出公輒奔魯仲由入赴孔氏之難爲蒯瞶所殺語在子路傳中孔悝竟立太子蒯瞶是爲莊公莊公居外怨大夫莫迎立元年卽位欲盡誅大臣曰寡人居外久矣子亦嘗聞之乎羣臣欲作亂乃止二年魯孔丘卒三年莊公上城見戎州曰戎虜何爲是戎州病之十月戎州告趙簡子簡子圍衛十

通志

卷七

周同姓世家一

五

一月莊公出奔衛人立公子斑師爲衛君齊伐衛虜斑師更立公子起爲衛君衛君起元年衛石曼專逐其君起起奔齊衛出公輒月齊復歸立初出公立十二年亡亡在外四年復入出公後元年賞從亡者立二十一年卒出公季父黔攻出公子而自立是爲悼公悼公五年卒子敬公弗立敬公十九年卒子昭公糾立是時三晉彊衛如小侯屬之昭公六年公子亶弑之代立是爲懷公懷公十一年公子頹弑懷公而代立是爲愼公愼公父公子適適父敬公愼公四十二年卒子聲公訓立聲公十一年卒子成侯速立成公十一年公孫鞅入秦十

四年衛更貶號曰侯二十九年成侯卒子平侯立平侯八年卒子嗣君立嗣君五年更貶號曰君獨有濮陽四十二年卒子懷君立懷君三十一年朝魏魏囚殺懷君魏更立嗣君弟是爲元君元君爲魏壻故魏立之元君十四年秦拔魏東地初置東郡更徙衛野王縣而并濮陽爲東郡二十五年元君卒子君角立君角九年秦并天下立爲始皇帝二十一年二世廢君角爲庶人衛祀絕

晉

唐叔虞者周武王子而成王弟初武王與叔虞母會時

通志

卷七

周同姓世家一

四

夢天謂武王曰余命女生子名虞余與之唐及生子文在其手曰虞故遂因命之曰虞武王崩成王立唐有亂周公誅滅唐成王與叔虞戲削桐葉爲珪以與叔虞曰以此封若史佚因請擇日立叔虞成王曰吾與之戲耳史佚曰天子毋戲言言則史書之禮成之樂歌之於是遂封叔虞於唐唐在河汾之東方百里故曰唐叔虞姓姬氏字子干叔虞之子燮是爲晉侯晉侯子寧族是爲武侯武侯之子服人是爲成侯成侯子福是爲厲侯厲侯子宜臼是爲靖侯靖侯已來年紀可推自唐叔至靖侯五世無其年數靖侯十七年周厲王出奔於虢大臣

行政號曰共和十八年靖侯卒子釐侯司徒立釐侯十四年周宣王初立十八年釐侯卒子獻侯籍立獻侯十一年卒子穆侯費王立穆侯取齊女爲夫人七年伐條生太子仇十年伐千畝有功生少子名曰成師晉人師服曰異哉君之命子也太子曰仇仇者讎也少子曰成師成師大號成之者也名自命也物自定也今適庶名反逆此後晉其能毋亂乎二十七年穆侯卒弟殤叔自立太子仇出奔殤叔三年周宣王崩四年穆侯太子仇率其徒襲殤叔而立是爲文侯文侯十年周幽王爲犬戎所殺周東徙而秦襄公始列爲諸侯三十五年文侯仇卒子昭侯伯立昭侯元年封文侯弟成師於曲沃曲沃邑大於翼翼晉君都邑也成師封曲沃號爲桓叔靖侯庶孫欒賓相桓叔桓叔是時年五十八矣好德晉國之衆皆附焉君子曰晉國之亂其在曲沃矣末大於本而得民心不亂何待七年晉大臣潘父弑其君昭侯而迎曲沃桓叔桓叔欲入晉晉人發兵攻桓叔桓叔敗還歸曲沃晉人共立昭侯子平爲君是爲孝侯誅潘父孝侯八年曲沃桓叔卒子鱣代桓叔是爲曲沃莊伯孝侯十五年曲沃莊伯弑其君晉孝侯於翼翼晉人攻曲沃莊伯莊伯復入曲沃晉人復立孝侯子郟爲君是爲鄂侯

通志

卷七

周同姓世家一

聖

鄂侯二年魯隱公初立鄂侯六年卒曲沃莊伯聞鄂侯  
卒乃興兵伐晉周平王使虢公將兵伐曲沃莊伯莊伯  
走保曲沃晉人共立鄂侯子光侯是爲哀侯哀侯二年  
曲沃莊伯卒子稱代莊伯立是爲曲沃武公哀侯六年  
魯弑其君隱公哀侯八年晉侵陘延陘延與曲沃武公  
謀九年伐晉於汾旁虜哀侯晉人乃立哀侯子小子爲  
君是爲小子侯小子元年曲沃武公使韓萬殺所虜晉  
哀侯曲沃益彊晉無如之何晉小子之四年曲沃武公  
誘召晉小子殺之周桓王使虢仲伐曲沃武公武公入  
於曲沃乃立哀侯弟緡爲晉侯晉侯緡四年宋執鄭祭

通志

卷五

周同姓世家一

聖

仲而立突爲鄭君晉侯十九年齊人管至父弑其君襄  
公二十八年齊桓公始霸曲沃莊伯伐晉侯緡滅之盡  
以其寶器賂獻於周釐王釐王命曲沃武公爲晉君列  
爲諸侯於是盡併晉地而有之曲沃武公已卽位三十  
七年矣更號曰晉武公晉武公始都晉國前卽位曲沃  
通年三十八年武公稱者先晉穆侯曾孫也曲沃桓叔  
孫也桓叔者始封曲沃武公莊伯子也自桓叔初封曲  
沃以至武公滅晉也凡六十七歲而卒代晉爲諸侯武  
公代晉二歲卒與曲沃通年卽位凡三十九年而卒子  
獻公詭諸立獻公元年周惠王弟頽攻惠王惠王出奔

居鄭之櫟邑五年伐驪戎得驪姬驪姬弟俱愛幸之八年士蔦說獻公曰故晉之羣公子多不誅亂且起乃使盡殺晉諸公子而城聚都之命曰絳始都絳九年晉羣公子既亡奔號號以其故再伐晉弗克十二年驪姬生奚齊獻公有意廢太子乃曰曲沃吾先祖宗廟所在而蒲邊秦屈邊翟不使諸子居之我懼焉於是使太子申生居曲沃公子重耳居蒲公子夷吾居屈獻公與驪姬子奚齊居絳晉國以此知太子不立也太子申生其母齊桓公女也曰齊姜早死申生同母女弟爲秦穆公夫人重耳母翟之狐氏也夷吾母重耳母女弟也獻公子

通志

卷七

周同姓世家一

聖

八人而太子申生重耳夷吾皆有賢行及得驪姬乃遠此三子十六年晉獻公作二軍公將上軍太子申生將下軍趙夙御戎畢萬爲右伐滅霍滅魏滅耿還爲太子城曲沃賜趙夙耿賜畢萬魏以爲大夫士蔦曰太子不得立矣分之都城而位以卿先爲之極又安得立不如逃之無使罪至爲吳太伯不亦可乎猶有令名太子不從十七年獻公使太子申生伐東山里克諫曰太子君之適嗣古者君行則守有守則從從曰撫軍守曰監國今以帥師非古制也公曰寡人有子未知其誰立里克不對而退公竟令太子帥師衣之偏衣佩之金玦里克

謝病不從太子太子遂伐東山十九年獻公曰始吾先  
君莊伯之誅晉亂而虢常助晉伐我又匿晉亡公子果  
爲亂今弗誅後遺子孫憂乃使荀息以屈產之乘假道  
於虞以伐虢取其下陽以歸獻公私謂驪姬曰吾欲廢  
太子以奚齊代之驪姬泣曰太子之立諸侯皆已知之  
而數將兵百姓附之奈何以賤妾之故廢適立庶君必  
行之妾自殺也驪姬佯譽太子而陰令人譖惡太子而  
欲立其子二十一年驪姬謂太子曰君夢齊姜太子速  
祭曲沃歸釐於君太子於是祭其母於曲沃上其薦胙  
於獻公獻公時出獵置胙於宮中驪姬使人置毒藥胙  
中居二日獻公從獵來還宰人上胙獻公獻公欲享之  
驪姬從旁止之曰胙所從來遠宜試之祭地地墳與犬  
犬死與小臣小臣死驪姬泣曰太子何忍也其父而欲  
弑代之況他人乎且君老矣旦暮之人曾不能待而欲  
弑之謂獻公曰太子所以然者不過以妾及奚齊之故  
妾願子母辟之他國若早自殺毋徒使母子爲太子所  
魚肉也始君欲廢之妾猶恨之至於今妾殊自失於此  
太子聞之奔新城獻公怒乃誅其傅杜原款或謂太子  
曰爲此藥者乃驪姬也太子何不自辭明之太子曰吾  
君老矣非驪姬寢不安食不甘卽辭之君且怒之不可

通志

卷七

周同姓世家一

四

或謂太子曰可奔他國太子曰被此惡名以出人誰內  
我我自殺耳遂自縊於新城此時重耳夷吾來朝人或  
告驪姬曰二公子怨驪姬之譖殺太子驪姬恐因譖二  
公子申生之藥胙二公子知之二子聞之恐重耳走蒲  
夷吾走屈保其城自備守二十二年獻公怒二子不辭  
而去果有謀矣乃使兵伐蒲蒲人之宦者勃鞞命重耳  
促自殺重耳逾垣宦者追斬其衣袪重耳遂奔翟使人  
伐屈屈城守不可下是歲也晉復假道於虞以伐虢虞  
之大夫宮之奇諫虞君曰晉不可假道也是且滅虞虞

通志

卷五

周同姓世家一

四

奇以其族去虞語其荀息傳中其冬晉滅虢虢公醜奔  
周還襲滅虞虜虞公及其大夫井伯百里奚以媵秦穆  
姬而修虞祀二十三年獻公遂發賈華等伐屈屈潰夷  
吾將奔翟冀芮曰不可重耳已在矣今往晉必移兵伐  
翟翟畏晉禍且及不如走梁梁近於秦秦彊吾君百歲  
後可以求入焉遂奔梁二十五年晉伐翟翟以重耳故  
亦擊晉於鬻桑晉兵解而去當此時晉彊西有河西與  
秦接壤北邊翟東至河南驪姬弟生悼子二十六年夏  
齊桓公大會諸侯於葵邱獻公病行後未至逢周之宰

孔宰孔曰齊桓公益驕不務德而務遠略諸侯弗平君

第母會母如晉何獻公亦病復還歸病甚乃謂荀息曰  
吾以奚齊爲後年少諸大臣不服恐亂起子能立之乎  
荀息曰能獻公曰何以爲驗對曰使死者復生生者不  
慙爲之驗於是屬奚齊於荀息荀息爲相主國政秋九  
月獻公卒里克邳鄭欲內重耳以三公子之徒作亂謂  
荀息曰三怨將起秦晉輔之子將何如荀息曰吾不可  
負先君言十月里克殺奚齊於喪次獻公未葬也荀息  
將死之或曰不如立奚齊弟悼子而傅之荀息立悼子  
而葬獻公十一月里克弑悼子於朝荀息死之君子謂  
荀息不負其言也初獻公將伐驪戎卜曰齒牙爲禍及

通志

卷五

周同姓世家一

四

破驪戎獲驪姬愛之竟以亂晉里克等已殺奚齊悼子  
使人迎公子重耳於翟欲立之重耳謝曰負父之命出  
奔父死不得修人子之禮侍喪重耳何敢人大夫其更  
立他子還報里克里克使迎夷吾於梁夷吾欲往呂省  
卻芮曰內猶有公子可立者而外求難信計非之秦輔  
疆國之威以入恐危乃使卻芮厚賂秦約曰卽得入請  
以晉河西之地予秦乃遣里克書曰誠得立請遂封子  
於汾陽之邑秦穆公乃發兵送夷吾於晉齊桓公聞晉  
內亂亦率諸侯如晉秦兵與夷吾亦至晉齊乃使隰朋  
會秦俱入夷吾立爲晉君是爲惠公齊桓公至晉之高

梁而還歸惠公元年使邳鄭謝秦曰始夷吾以河西地許君今幸得入立大臣皆曰地者先君之地君亡在外何以得擅許秦者寡人爭之弗能得故謝秦亦不與里克汾陽邑而奪之權四月周襄王使周公忌父會齊秦大夫共禮晉惠公惠公以重耳在外畏里克爲變賜里克死語在里克傳時邳鄭使謝秦未還故不及於難晉君改葬共太子申生秋狐突之下國遇申生與之言曰夷吾無禮予請於帝許罰有罪矣語在狐突傳中其時又有童兒謠云共太子改葬矣後十四年晉亦不昌昌乃在兄邳鄭使秦聞里克誅乃說秦繆公曰呂省卻稱

通志

卷七

周同姓世家一

七

冀芮實爲不從若重賂與謀出晉君人重耳事必就秦繆公許之使人與歸報晉厚賂三子三子曰幣厚言甘此必邳鄭賣我於秦遂殺邳鄭及里克邳鄭之黨七輿大夫邳鄭子豹奔秦言伐晉繆公弗聽惠公之立倍秦地及里克誅七輿大夫國人不附二年周使召公過禮晉惠公惠公禮倨召公譏之四年晉饑乞糴於秦繆公問百里奚百里奚曰天蓄流行國家代有救菑恤鄰國之道也與之邳鄭子豹曰伐之繆公曰其君是惡其民何罪卒與粟自雍屬絳五年秦饑請糴於晉晉君謀之慶鄭曰以秦得立已而倍其地約晉饑而秦貸我今秦

饑請糴與之何疑而謀之虢射曰往年天以晉賜秦秦弗取而貸我今天以秦賜晉晉其可以逆天乎遂伐之惠公用虢射謀不與秦粟而發兵且伐秦秦大怒亦發兵伐晉六年春秦繆公將兵伐晉晉惠公謂慶鄭曰秦師深矣奈何鄭曰秦內君君倍其賂晉饑秦輸粟秦饑而晉倍之乃欲因其饑伐之其深不亦宜乎晉卜御右慶鄭皆吉公曰鄭不孫乃更令步陽御戎家僕徒爲右進兵九月壬戌秦繆公晉惠公合戰韓原惠公馬繫不行秦兵至公窘召慶鄭爲御鄭曰不用卜敗不亦當乎遂去更令梁繇靡御虢射爲右轅秦繆公繆公壯士冒

通志

卷七

周同姓世家一

吳

敗晉軍晉軍敗遂失秦繆公反獲晉公以歸秦將以祀上帝晉君姊爲繆公夫人衰絰涕泣公曰得晉侯將以爲樂今乃如此且吾聞箕子見唐叔之初封曰其後必大晉庸可滅乎乃與晉侯盟王城而許之歸晉侯亦使呂省等報國入曰孤雖得歸毋面目見社稷卜曰立子圉晉人聞之皆哭秦繆公問呂省晉國和乎對曰不和小人懼失君亡親不憚立子圉曰必報讎寧事戎狄其君子則愛君而知罪以待秦命曰必報德有此二故不和於是秦繆公更舍惠公饋之七年十一月歸晉侯晉侯至國誅慶鄭修改教謀曰重耳在外諸侯多利內之

欲使人殺重耳於翟重耳聞之如齊八年使太子圉質秦初惠公亡在梁梁伯以女妻之生一男一女梁伯卜之男爲人臣女爲人妾故名男爲圉女爲妾十歲秦滅梁梁伯好土功治城溝民力罷怨其衆數相驚曰秦寇至民恐惑秦竟滅之十三年晉惠公病內有數子太子圉曰吾母家在梁梁今秦滅之我外輕於秦而內無援於國君卽不起病大夫輕更立他公子乃謀與其妻俱亡歸秦女曰子一國太子辱在此秦使婢子侍以固子之心子亡矣我不從子亦不敢言子圉遂亡歸晉十四年九月惠公卒太子圉立是爲懷公子圉之亡秦怨之

通志

卷五

周同姓世家一

四

乃求公子重耳欲內之子圉之立畏秦之伐也乃令國中諸從重耳亡者與期期盡不到者盡滅其家狐突之子毛反偃從重耳在秦弗肯召懷公怒囚狐突突曰臣子事重耳有年數矣今召之是教之反君也何以教之懷公來殺狐突秦繆公乃發兵送納重耳使人告欒郤之黨爲內應殺懷公於高粱入重耳重耳立是爲文公重耳自少好士年十七有賢士五人曰趙衰狐偃咎犯文公舅也賈佗先軫魏武子自獻公爲太子時重耳固已成矣獻公卽位重耳年二十一獻公十三年以驪姬故重耳備蒲城守獻公二十一年殺太子申生驪姬

讒之恐不辭獻公而守蒲城獻公二十二年使宦者勃鞮趣殺重耳重耳逾垣宦者遂斬其衣袪重耳遂奔翟翟其母國也是時重耳年四十三從此五十其餘不名者數十人至翟翟伐咎如得二女以長女妻重耳生伯儵叔劉以少女適趙衰生盾居翟五歲而晉獻公卒里克已殺奚齊悼子乃使人迎立重耳重耳畏殺因固謝不敢入己而晉更迎其弟夷吾而立之是爲惠公惠公七年畏重耳乃使宦者勃鞮與壯士欲殺重耳重耳聞之乃謀趙衰等曰始吾奔翟非以爲可用興以近易通故且休足足久矣固願徙之大國夫齊桓公好善志

通志

卷七

周同姓世家一

辛

在霸王收恤侯諸今聞管仲隰朋死此亦欲得賢佐盍往乎於是遂行重耳謂其妻曰侍我二十五年不來乃嫁其妻笑曰犁二十五年吾冢上柏大矣雖然妾待子重耳居翟凡十二年而去過衛衛文公不禮去過五鹿飢而從野人乞食野人盛土器中進之重耳怒趙衰曰土者有土也君其拜受之至齊齊桓公厚禮而以宗女妻之有馬二十乘重耳安之重耳至齊二歲而桓公卒會豎刁等爲內亂齊孝公之立諸侯兵數至留齊凡五歲重耳愛齊女母去心趙衰咎犯乃於桑下謀行齊女侍者在桑上聞之以告其主其主乃殺侍者勸重耳趣

行重耳曰人生安樂孰知其他必死於此不能去齊女  
曰子一國公子窮而來此數士者以子爲命子不疾反  
國報勞臣而懷女德竊爲子羞之且不求何時得功乃  
與趙衰等謀醉重耳載以行行遠而覺重耳大怒引戈  
欲殺咎犯咎犯曰殺臣成子偃之願也重耳曰事不成  
我食舅氏之肉咎犯曰事不成犯肉腥臊何足食乃止  
遂行過曹曹共公不禮欲觀重耳駢脅曹大夫釐負羈  
曰晉公子賢又同姓窮來過我奈何不禮共公不從其  
謀負羈乃私遺重耳食置璧其下重耳受其食還其璧  
去過宋宋襄公新困兵於楚傷於泓聞重耳賢乃以國

通志

卷七

周同姓世家一

五

禮禮於重耳宋司馬公孫固善於咎犯曰宋小國新困  
不足以求入更之大國乃去過鄭鄭文公弗禮鄭叔瞻  
諫其君曰晉公子賢而其從者皆國相且又同姓鄭之  
出自厲王而晉之出自武王鄭君曰諸侯亡公子過此  
者衆安可盡禮叔瞻曰君不禮不如殺之且後爲國患  
鄭君不聽重耳去之楚楚成王以適諸侯禮待之重耳  
謝不敢當趙衰曰子亡在外十餘年小國輕子況大國  
乎今楚大國而固遇子子其毋讓此天開子也遂以客  
禮見之成王厚遇重耳重耳甚卑成王曰子卽反國何  
以報寡人重耳曰羽毛齒角玉帛君王所餘未知所以

報王曰雖然何以報不穀重耳曰卽不得已與君王以  
兵車會平原廣澤請辟王三舍楚將子玉怒曰王遇晉  
公子至厚今重耳言不孫請殺之成王曰晉公子賢而  
困於外久從者皆國器此天所置庸可殺乎且言何以  
易之居楚數月而晉太子圉亡秦秦怨之聞重耳在楚  
乃召之成王曰楚遠更數國乃至晉秦晉接境秦君賢  
子其勉行厚送重耳重耳至秦繆公以宗女五人妻重  
耳故子圉妻與往重耳不欲受司空季子曰其國且代  
況其故妻乎且受以結秦親而求人子乃拘小禮忘大  
醜乎遂受繆公大歡與重耳飲趙衰歌黍苗詩繆公曰

通志

卷七

周同姓世家一

五

知子欲急反國矣趙衰命重耳下再拜曰孤臣之仰君  
如百穀之望時雨是時晉惠公十四年秋惠公以九月  
卒子圉立十一月葬惠公十二月晉國大夫欒郤等聞  
重耳在秦皆陰來勸重耳趙衰等反國爲內應甚衆於  
是秦繆公乃發兵與重耳歸晉晉聞秦兵來亦發兵拒  
之然皆知公子重耳人也唯惠公之故貴臣呂卻之屬  
不欲立重耳重耳出亡凡十九歲而得入時年六十二  
矣晉人多附焉文公元年春秦送重耳至河咎犯曰臣  
從君周旋天下過亦多矣臣猶知之況於君乎請從此  
去矣重耳曰若反國所不與子犯共者河伯視之乃投

壁河中以與子犯盟渡河秦兵圍令狐晉軍於廬柳二月辛丑咎犯與秦晉大夫盟於郇壬寅重耳入於晉師丙午入於曲沃丁未朝於武宮卽位爲晉君是爲文公羣臣皆往懷公圍奔高梁戊申使人殺懷公懷公故大臣呂省卻芮本不附文公文公立恐誅乃欲與其徒謀燒公宮殺文公文公不知始嘗欲殺文公宦者履鞮知其謀欲以告文公解前罪求見文公文公不見使人讓之曰蒲城之事女斬予祛其後我從翟君獵女爲惠公來殺我惠公與女期三日至而女一日至何速也女其念之宦者曰臣刀鋸之餘不敢以二心事君倍主故得罪於君君已反國其母蒲翟乎且管仲射鉤桓公以霸今刑餘之人以事告而君不見禍又且及矣於是見之遂以呂卻等告文公欲召呂卻呂卻等黨多文公恐初入國國人賣已乃爲微行會秦繆公於王城國人莫知三月己丑呂卻等果反焚公宮不得文公文公之衛徒與戰呂卻等引兵欲奔秦繆公誘呂卻等殺之河上晉國復而文公得歸夏迎夫人於秦秦所與文公妻者卒爲夫人秦送三千人爲衛以備晉亂文公修政施惠百姓賞從亡者及功臣大者封邑小者尊爵未盡行賞周襄王以弟帶難出居鄭地來告急晉晉初定欲發兵恐

通志

卷五

周同姓世家一

五

他亂起是以賞從亡未至隱者介子推推亦不言祿祿亦不及推謂文公之興天實啓之而諸從亡者貪天之功以爲己力不可與處乃竄身懸上山中文公求之不獲環其山而封之號介山曰以記吾過且旌善人事具子推傳是時有從亡賤臣壺叔者請於文公曰君三行賞賞不及臣敢請罪文公曰夫導我以仁義防我以德惠此受上賞輔我以行卒以成立此受次賞矢石之難汗馬之勞此復受次賞若以力事我而無補吾缺者此復受次賞三賞之後故且及子晉人聞之皆說二年春秦軍河上將入王趙襄曰求霸莫如入王尊周周晉同

通志

卷七

周同姓世家一

五

姓晉不先入王後秦入之母以令於天下方今尊王晉之資也三月甲辰晉乃發兵至陽樊圍温入襄王於周四月殺王弟帶周襄王賜晉河內陽樊之地四年楚成王及諸侯圍宋宋公孫固如晉告急先軫曰報施定霸於今在矣狐偃曰楚新得曹而初婚於衛若伐曹衛楚必救之則宋免矣於是晉作三軍趙襄舉卻縠將中軍卻臻佐之使狐偃將上軍狐毛佐之命趙襄爲卿欒枝將下軍先軫佐之荀林父御戎魏犢爲右往伐冬十二月晉兵先下山東而以原封趙襄五年春晉文公欲伐曹假道於衛衛人弗許還自河南度侵曹伐衛正月取

五鹿二月晉侯齊侯盟于斂孟衛侯請盟晉人不許衛侯欲與楚國人不欲故出其君以說晉衛侯居襄牛公子買守衛楚救衛不卒晉侯圍曹三月丙午晉師入曹數之以其不用釐負羈言而用美女乘軒者三百人也令軍毋入釐負羈宗家以報德楚圍宋宋復告急晉文公欲救則攻楚爲楚嘗有德不欲伐也欲釋宋宋又嘗有德於晉患之先軫曰執曹伯分曹衛地以予宋楚急曹衛其勢宜釋宋於是文公從之楚成王乃引兵歸楚將子玉曰王遇晉至厚今知楚急曹衛而故伐之是輕王王曰晉侯亡在外十九年困日久矣果得反國險阨

通志

楚志

周同姓世家一

五

盡知之能用其民天之所開不可當子玉請曰非敢必有功願以閒執讒慝之口也楚王怒少與之兵於是子玉使宛春告晉請復衛侯而封曹臣亦釋宋咎犯曰子玉無禮矣君取一臣取二勿許先軫曰定人之謂禮楚一言定三國子一言而亡之我則無禮不許楚是棄宋也不如私許曹衛以誘之執宛春以怒楚旣戰而後圖之晉侯乃囚宛春於衛且私許復曹衛曹衛告絕於楚楚得臣怒擊晉師晉師退軍吏曰何爲退文公曰昔在楚約退三舍可倍乎楚師欲去得臣不肯四月戊辰宋公齊將秦將與晉侯次城濮己巳與楚兵合戰楚兵敗

得臣收餘兵去甲午晉師還至衡雍作王宮于踐土初  
鄭助楚楚敗懼使人請盟晉侯與鄭伯盟五月丁  
未獻楚俘於周駟介百乘徒兵千天子使王子虎命晉  
侯爲伯賜大輅彤弓矢百茲弓矢千柎鬯一卣珪瓚虎  
賁三百人晉侯三辭然後稽首受之周作晉文侯命王  
若曰父義和丕顯文武能慎明德昭登於上布聞在下  
維時上帝集厥命于文武恤朕身繼予一人永其在位  
於是晉文公稱伯癸亥壬子虎盟諸侯於王庭晉焚楚  
軍火數日不息文公歎左右曰勝楚而君猶憂何文公  
曰吾聞能戰勝安者唯聖人是以懼且子玉猶在庸可

通志

卷七

周同姓世家一

五

喜乎子玉之敗而歸楚成王怒其不用其言貪與晉戰  
讓責子玉子玉自殺晉文公曰我擊其外楚誅其內內  
外相應於是乃喜六月晉人復入衛侯壬午晉侯渡河  
北歸國論功行賞語在狐偃傳冬晉侯會諸侯於溫欲  
率之朝周力未能恐其有畔者乃使人言周襄王狩于  
河陽壬申遂率諸侯朝王於踐土孔子讀史記至文公  
曰諸侯無召王王狩河陽者春秋諱之也丁丑諸侯圍  
許曹伯臣或說晉侯曰齊桓公合諸侯而國異姓今君  
爲會而滅同姓曹叔振鐸之後晉唐叔之後合諸侯而  
滅兄弟非禮晉侯說復曹伯於是晉始作三行荀林父

將中行先穀將右行先蔑將左行七年晉文公秦繆公  
共圍鄭以其無禮於文公亡過時及城濮時鄭助楚也  
圍鄭欲得叔瞻叔瞻聞之自殺鄭持叔瞻尸告晉晉曰  
必得鄭君而甘心焉鄭恐乃使人說秦繆公曰亡鄭厚  
晉於晉得矣而秦未爲利君何不解鄭使爲東道交秦  
伯說罷兵晉亦罷兵九年冬晉文公卒子襄公歡立是  
歲鄭伯亦卒鄭人或賣其國於秦秦繆公發兵往襲鄭  
十二月秦兵過我郊襄公元年春秦師過周無禮王孫  
滿譏之兵至滑鄭賈人弦高將市于周遇之以十二牛  
勞秦師秦師驚而還滅滑而去晉先軫曰秦伯不用蹇

通志

卷七

周同姓世家一

五

叔反其衆心此可擊欒枝曰未報先君施於秦擊之不  
可先軫曰秦侮吾孤伐吾同姓何德之報遂擊之襄公  
墨衰經四月敗秦師于穀虜秦三將孟明視西乞術白  
乙丙以歸遂壘以葬文公文公夫人秦女爲秦請三將  
遣之後三年秦復使孟明伐晉報穀之敗取晉汪以歸  
四年秦繆公大興兵伐我渡河取王官封穀尸而去晉  
恐不敢出遂城守五年晉伐秦取新城報王官役也六  
年趙襄成子欒貞子咎季子犯霍伯皆卒趙盾代趙襄  
執政七年八月襄公卒太子夷臯少晉人以難故欲立  
長君趙盾曰立襄公弟雍好善而長先君愛之且近於

秦秦故好也立善則固事長則順奉愛則孝結舊好則安賈季曰不如其弟樂辰嬴嬖於二君立其子民必安之趙盾曰辰嬴賤班在九人下其子何震之有且爲二君嬖淫也爲先君子不能求大而出在小國賤也母淫子僻無威陳小而遠無援將何可乎使士會如秦迎公子雍賈季亦使人召公子樂於陳趙盾廢賈季以其殺陽處父十月葬襄公十一月賈季奔翟是歲秦繆公亦卒靈公元年四月秦康公曰昔文公之入也無衛故有呂卻之患乃多與公子雍衛太子母繆嬴日夜抱太子以號泣於朝曰先君何罪其嗣亦何罪舍適而外求君

通志

卷七

周同姓世家一

五

將安置此出朝則抱以適趙盾所頓首曰先君奉此子而屬之子曰此子材吾受其賜不材吾怨子今君卒言猶在耳而棄之若何趙盾與諸大夫皆患繆嬴且畏誅乃背所迎而立太子夷臯是爲靈公發兵以距秦送公子雍者趙衰爲將往擊秦敗之令狐先蔑隨會亡奔秦秋齊宋衛鄭曹許君皆會趙盾盟於扈以靈公初立故也四年伐秦取少梁秦亦取晉之穀六年秦康公伐晉取羈馬晉侯怒使趙盾趙穿卻缺擊秦大戰河曲趙穿最有功七年晉六卿患隨會之在秦常爲晉亂乃佯令

魏壽餘反晉降秦秦使隨會之魏因執會以歸晉八年

周頃王崩公卿爭權故不赴晉使趙盾以車八百乘平周亂而立匡王是年楚莊王初卽位十二年齊人弑其君懿公十四年靈公壯侈厚斂以雕牆從臺上彈人觀其逃丸也宰夫脯熊蹯不熟靈公怒殺宰夫使婦人持其屍出棄之過朝趙盾隨會前數諫不聽已又見死人手二人前諫隨會先諫不聽靈公患之使鉏麇刺趙盾盾闔門開居處節鉏麇退歎曰殺忠臣棄君命罪一也遂觸樹而死初盾嘗田首山見桑下有餓人餓人示眦明也盾與之食食其半問其故曰宦三年未知母之存不願遺母盾義之益與之飯肉已而爲晉宰夫趙盾弗

通志

卷七

周同姓世家一

堯

復知也九月晉靈公飲趙盾酒伏甲將攻盾公宰示昧明知之恐盾醉不能起而進曰君賜臣觴三行可以罷欲以去趙盾令先母及難盾旣去靈公伏士未會先縱鬻狗名敖明爲盾搏殺狗盾曰棄人用狗雖猛何爲然不知明之爲陰德也已而靈公縱伏士出逐趙盾示昧明反擊靈公之伏士伏士不能進而竟脫盾盾問其故曰我桑下餓人間其名弗告明亦亡去盾遂奔未出晉境乙丑盾昆弟將軍趙穿襲弑靈公於桃園而迎趙盾趙盾素貴得民和靈公小侈民不附故爲弑易盾復位晉太史董狐書曰趙盾弑其君以視於朝盾曰弑者趙

穿我無罪太史曰子爲正卿而亡不出境反不誅國亂  
非子而誰孔子聞之曰董狐古之良史也書法不隱宣  
子良大夫也爲法受惡惜也出疆乃免趙盾使趙穿迎  
襄公弟黑臀于周立之是爲成公成公者文公少子其  
母周女也壬申朝于武宮成公元年賜趙氏爲公族伐  
鄭鄭倍晉故也三年鄭伯初立附晉而棄楚楚怒伐鄭  
晉往救之六年伐秦虜秦將赤七年成公與楚莊王爭  
疆會諸侯于扈陳畏楚不會晉使中行桓子伐陳因救  
鄭與楚戰敗楚師是年成公卒子景公據立景公元年  
春陳大夫夏徵舒弑其君靈公二年楚莊王伐陳誅徵  
舒三年楚莊王圍鄭鄭告急晉晉使荀林父將中軍隨  
會將上軍趙朔將下軍卻克欒書先穀韓厥鞏朔佐之

通志

卷五

周同姓世家一

五

六月至河聞楚已服鄭鄭伯肉袒與盟而去荀林父欲  
還先穀曰凡來救鄭不至不可將率離心卒度河楚已  
服鄭欲飲馬于河爲名而去楚與晉軍大戰鄭新附楚  
畏之反助楚攻晉晉軍敗走河爭度船中人指甚衆楚  
虜我將智罃歸而林父曰臣爲督將軍敗當誅請死景  
公欲許之隨會曰昔文公之與楚戰城濮成王歸殺子  
玉而文公乃喜今楚已敗我師又誅其將是助是殺仇  
也乃止四年先穀以首計而敗晉軍河上恐誅乃奔翟

與翟謀伐晉晉覺乃族穀穀先軫子也五年伐鄭爲助楚故也是時楚莊王彊以挫晉兵河上也六年楚伐宋宋來告急晉欲救之伯宗謀曰楚天方開之不可當乃使解揚紿爲救宋鄭人執與楚楚厚賜使反其言令宋急下解揚紿許之卒致晉君言楚欲殺之或諫乃歸解揚七年晉使隨會滅赤狄八年使卻克於齊齊頃公母從樓上觀而笑之所以然者卻克僂而魯使蹇衛使眇故齊亦令人如之以導客卻克怒歸至河上曰不報齊者河伯視之至國請伐齊景公間知其故曰子之怨安足以煩國弗聽魏文子請老休辟卻克卻克執政九年楚莊王卒晉伐齊齊使太子彊爲質於晉晉兵罷十一年春齊伐魯取隆魯告急衛衛與魯皆因卻克告急於晉晉乃使卻克樂書韓厥以兵車八百乘與魯衛共伐齊夏與頃公戰於鞏傷困頃公頃公乃與其右易位下取飲以得脫去齊師敗走晉追北至齊頃公獻寶器以求平不聽卻克曰必得蕭同姪子爲質齊使曰蕭桐姪子頃公母頃公母猶晉君母奈何必得之不義請復戰晉乃許與平而去楚申公巫臣盜夏姬以奔晉晉以巫臣爲邾大夫十二年冬齊頃公如晉欲上尊晉景公爲王景公謝不敢晉始作六卿韓厥鞏朔趙穿荀躒趙

通志

卷五

周同姓世家一

五

括趙旃皆爲卿智罃自楚歸十三年魯成公朝晉晉弗敬魯怒去倍晉晉伐鄭取汜十四年梁山崩問伯宗伯宗以爲不足怪也十六年楚將子反怨巫臣滅其族巫臣怒遺子反書曰必令子罷於奔命乃請使吳令其子爲吳行人教吳乘車用兵吳晉始通約伐楚十七年誅趙同趙括族滅之韓厥曰趙衰趙盾之功豈可忘乎奈何絕祀乃復令趙庶子武爲趙後復與之邑十九年夏景公病立其太子壽曼爲君是爲厲公後月餘景公卒厲公元年初立欲和諸侯與秦桓公夾河而盟歸而秦倍盟與翟謀伐晉三年使呂相讓秦因與諸侯伐秦至

通志

卷七

周同姓世家一

空

涇敗秦師於麻隧虜其將成差五年三郤讒伯宗殺之伯宗以好直諫得禍國人以是不附厲公六年春鄭倍晉與楚盟晉怒欒書曰不可以當吾世而失諸侯乃發兵厲公自將五月渡河聞楚兵來救范文子請公欲還卻至日發兵誅逆見彊辟之無以令諸侯遂與戰癸巳射中楚共王目楚兵敗於鄢陵子反收餘兵拊循欲復戰晉患之共王召子反其侍者豎陽穀進酒子反醉不能見王怒讓子反子反死王遂引兵歸晉由此威諸侯欲以令天下求霸厲公多外嬖姬歸欲盡去羣大夫而立諸姬兄弟寵姬兄曰胥童嘗與卻至有怨及欒書又

怨郤至不用其計而遂敗楚乃使人間謝楚楚來詐厲  
公曰鄢陵之戰實至召楚欲作亂內子周立之會與國  
不具是以事不成厲公告欒書欒書曰其殆有矣願公  
試使人之周微考之果使郤至於周欒書又使公子周  
見郤至郤至不知見賣也厲公驗之信然遂怨郤至欲  
殺之八年厲公獵與姬飲郤至殺豕奉進宦者奪之郤  
至射殺宦者公怒曰季子欺予將誅三郤未發也郤錡  
欲攻公曰我雖死亦病矣郤至曰信不反君智不害民  
勇不作亂失此三者誰與我我死耳十二月壬午公令  
胥童以兵八百人襲攻殺三郤胥童因以劫欒書中行

通志

卷七

周同姓世家一

五

偃于朝曰不殺二子患必及公公曰一旦殺三卿寡人  
不忍益也對曰人將忍君公弗聽謝欒書等以誅郤氏  
罪大夫復位二子頓首曰幸甚幸甚公使胥童爲卿閏  
月乙卯厲公游匠驪氏欒書中行偃以其黨襲捕厲公  
囚之殺胥童而使人迎公子周于周而立之是爲悼公  
悼公元年正月庚申欒書中行偃弑厲公葬之以一乘  
車厲公囚六日死死十日庚午智罃迎公子周來至絳  
刑雞與大夫盟而立之辛巳朝于武宮二月乙酉卽位  
悼公周者大父捷晉襄公少子也不得立號爲桓叔桓  
叔最愛桓叔生惠伯談談生悼公悼公之立年十四矣

悼公初立逐不臣者七人修舊功施德惠收文公入時  
功臣後秋伐鄭鄭師敗遂至陳三年晉會諸侯悼公問  
羣臣孰可用者祁僎舉解狐解狐僎之仇復問舉其子  
祁午君子謂祁僎可謂不黨矣外舉不隱仇內舉不隱  
子方會諸侯悼公弟揚干亂行魏絳戮其僕悼公怒或  
諫公公卒賢絳任之政使和戎戎大親附十一年悼公  
曰自吾用魏絳九合諸侯和戎翟魏子之力也賜之樂  
三讓乃受之冬秦取我櫟十四年晉使六卿率諸侯伐  
秦及涇大敗秦軍至棫林而去十五年悼公問治國於  
師曠師曠曰唯仁義爲本冬悼公卒子平公彪立平公

通志

卷七

周同姓世家一

畜

元年伐齊齊靈公與戰靡下齊師敗走晉追逐圍臨菑  
盡燒屠其郭中東至膠南至沂齊皆城守晉乃引兵歸  
六年魯襄公朝晉晉欒逞有罪奔齊八年齊莊公微遣  
欒逞於曲沃以兵隨之齊兵上太行欒逞從曲沃中反  
襲入絳絳不戒平公欲自殺范獻子止公以其徒擊逞  
逞敗走曲沃曲沃攻逞逞死遂滅欒氏宗逞者欒書孫  
也其入絳與魏氏謀齊莊公聞逞敗乃還取晉之朝歌  
去以報臨菑之役也十年齊崔杼弑其君莊公晉囚齊  
亂伐敗齊於高唐去報太行之役也十四年吳延陵季  
子來使與趙文子韓宣子魏獻子語曰晉國之政卒歸

此三家矣十九年齊使晏嬰如晉與叔嚮語叔嚮曰晉季世也公厚賦爲臺池而不恤政政在多門其可久乎晏子然之二十二年伐燕二十六年平公卒子昭公夷立昭公六年卒六卿彊公室卑子頃公去疾立頃公六年周景王崩王子爭立晉六卿平王室亂立敬王九年魯季氏逐其君昭公昭公居乾侯十一年衛宋使使請晉納魯君季平子私賂范獻子獻子受之乃謂晉君曰季氏無罪不果入魯君十二年晉之宗家祁傒孫叔嚮子相惡於君六卿欲弱公室乃遂以法盡滅其族而分其邑爲十縣各令其子爲大夫晉益弱六卿皆大十四

通志

卷七

周同姓世家一

五

年頃公卒子定公午立定公十一年魯陽虎奔晉趙鞅簡子舍之十二年孔子相魯十五年趙鞅使邯鄲大夫午不信欲殺午午與中行寅范吉射親攻趙鞅鞅走保晉陽定公圍晉陽荀櫟韓不信魏侈與范中行為仇乃移兵伐范中行范中行反晉君擊之敗范中行范中行走朝歌保之韓魏爲趙鞅謝晉君乃赦趙鞅復位二十二年晉敗范中行氏二子奔齊三十年定公與吳王夫差會黃池爭長趙鞅時從卒長吳三十一年齊田恆弑其君簡公三十三年孔子卒三十七年定公卒子出公鑿立出公十七年知伯與趙韓魏共分范中行地以爲

毘出公怒告齊魯欲以伐四卿四卿恐遂反攻出公出  
公奔齊道死故智伯乃立昭公會孫驕爲晉君是爲哀  
公哀公大父雍晉昭公少子也號爲戴子戴子生忌忌  
善知伯早死故知伯欲盡并晉未敢乃立忌子驕爲君  
當是時晉國政皆決智伯晉哀公不得有所制知伯遂  
有范中行地最彊哀公四年趙襄子韓康子魏桓子共  
殺知伯盡并其地十八年哀公卒子幽公柳立幽公之  
時晉畏反朝韓趙魏之君獨有絳曲沃餘皆入三晉十  
五年魏文侯初立十八年幽公淫婦人夜竊出毘中盜  
殺幽公魏文侯以兵誅晉亂立幽公子止是爲烈公烈  
公十九年周威烈王賜趙韓魏皆命爲諸侯二十七年  
烈公卒子孝公頎立孝公元年魏武侯初立襲邯鄲不  
勝而去十七年孝公卒子靜公俱酒立是歲齊威王元  
年也靜公二年魏武侯韓哀侯趙敬侯滅晉而三分其  
地靜公遷爲家人晉絕不祀

鄭

鄭桓公友者周厲王少子而宣王庶弟也宣王立二十  
二年友初封於鄭封三十三歲百姓皆便愛之幽王以  
爲司徒和集周民周民皆說河洛之間人便思之爲司  
徒一歲幽王以褒后故王室治多邪諸侯或畔之於是

桓公問周太史伯曰王室多故予安逃死乎太史伯對曰獨洛之東土河濟之南可居公曰何以對曰地近鄆號鄆號之君貪而好利百姓不附今公爲司徒民皆愛公公誠請居之號鄆之君見公方用事輕分公地公誠居之號鄆之民皆公之民也公曰吾欲南之江上如何對曰昔祝融爲高辛火正其功大矣而其於周未有興者楚其後也周衰楚必繼興興非鄭之利也公曰吾欲居西方何如對曰其民貪而好利難久居公曰周衰何國興者對曰齊秦晉楚乎夫齊姜姓伯夷之後也伯夷佐堯典禮秦嬴姓伯翳之後也伯翳佐舜懷柔百物及

通志

卷七

周同姓世家一

七

楚之先皆嘗有功於天下而周武王克紂後成王封叔虞于唐其地阻險以此有德與周衰並亦必興矣桓公曰善於是卒言諸王東徙其民洛東而號鄆果獻十邑竟國之二歲犬戎殺幽王於驪山下并殺桓公鄭人共立其子掘突是爲武公武公娶申女爲夫人曰武姜生太子寤生生之難夫人弗愛後生少子叔段段生易夫人愛之二十七年武公疾夫人請立段爲太子公弗聽是歲武公卒寤生立是爲莊公莊公元年封弟段於京號太叔祭仲曰京大於國非所以封庶也莊公曰武姜欲之我弗敢奪也段至京繕甲治兵二十二年段果襲

鄭武姜爲內應莊公發兵伐段段走伐京京人畔段段  
出走鄆鄆潰段出奔共於是莊公遷其母武姜於城穎  
誓言曰不至黃泉母相見也居歲餘已悔思母穎谷之  
考叔有獻於公公賜食考叔曰臣有母請君食賜臣母  
莊公曰我甚思母惡負盟奈何考叔曰穿地至黃泉則  
相見矣於是遂從之見母二十四年宋繆公卒公子馮  
奔鄭鄭侵周地取禾二十五年衛州吁弑其君桓公自  
立與宋伐鄭以馮故也二十七年始朝周桓王桓王怒  
其取禾弗禮也二十九年莊公怒周弗禮魯易祈許田

三十三年宋殺孔父三十七年莊公不朝周桓王率陳

通志

卷五

周同姓世家一

六

蔡虢衛伐鄭莊公與祭仲高渠彌發兵自救王師大敗  
祝聃射中王臂祝聃請從之鄭伯止之曰犯長且難之  
況敢陵天子乎乃止夜令祭仲問王疾三十八年北戎  
伐齊齊使求救鄭遣太子忽將兵救齊齊釐公欲妻之  
忽謝曰我小國非齊敵也時祭仲與俱勸使取之曰君  
多內寵太子無大援將不立三公子皆君也所謂三公  
子者太子忽其弟突次弟子亶也四十三年鄭莊公卒  
初祭仲甚有寵於莊公莊公使爲卿公使娶鄧女生太  
子忽故祭仲立之是爲昭公莊公又娶宋雍氏女生厲  
公突雍氏有寵於宋宋莊公聞祭仲之立忽乃使人誘

召祭仲而執之曰不立突將死亦執突以求賂焉祭仲與宋盟以突歸立之昭公忽聞祭仲以宋要立其弟突九月辛亥忽出奔衛己亥突至鄭立是爲厲公厲公四年祭仲專政厲公患之陰使其壻雍糾殺祭仲祭仲反殺雍糾語在祭仲傳中厲公懼出居邊邑櫟祭仲迎昭公忽六月乙亥復入鄭即位秋鄭厲公突因櫟人殺其大夫單伯遂居之諸侯聞厲公出奔伐鄭弗克去宋頗與厲公兵自守於櫟鄭以故亦不伐櫟昭公二年自昭公爲太子時惡高渠彌及昭公卽位渠彌懼其殺已冬十月辛卯渠彌與昭公出獵射殺廟公於野祭仲與渠彌不敢入厲公乃更立昭公弟子亶爲君是爲子亶也

通志

卷七

周同姓世家一

完

無諡號子亶元年七月齊襄公會諸侯於首止鄭子亶往會高渠彌相從祭仲稱疾不行所以然者子亶自齊襄公爲太子時嘗會鬪相仇及會祭仲請子亶無行子亶曰齊疆而厲公居櫟卽不往是率諸侯伐我內厲公我不如往往何遽必辱且又何至是卒行於是祭仲恐齊并殺之故稱疾子亶至不謝齊侯齊侯怒遂伏甲而殺子亶高渠彌亡歸歸與祭仲謀召子亶弟公子嬰於陳而立之是爲鄭子是戕齊襄公使公子彭生醉拉殺魯桓公鄭子八年齊人管至父等作亂弑其君襄公十

二年宋人長萬弑其君湣公鄭祭仲死十四年故鄭亡厲公突在櫟者使人誘劫鄭大夫甫瑕要以求入瑕曰舍我我爲君殺鄭子而入君厲公與盟乃舍之六月甲子瑕殺鄭子及其二子而迎厲公突突自櫟復入卽位初內蛇與外蛇鬪於鄭南門中內蛇死居六年厲公果復入人而讓其伯父原曰我亡國外居伯父無意入我亦甚矣原曰事君無二心人臣之職也原知罪矣遂自殺厲公於是謂甫瑕曰子之事君有二心矣遂誅之瑕曰重德不報誠然哉厲公突後元年齊桓公始霸五年燕衛與周惠王弟頹伐王王出奔溫立弟頹爲王六年

通志

卷七

周同姓世家一

字

惠王告急鄭厲公發兵擊周王子頹弗勝於是與周惠王歸王居于櫟七年春鄭厲公與虢叔襲殺王子頹而入惠王于周秋厲公卒子文公躋立厲公立四歲亡居櫟居櫟十七歲人立七歲與亡凡二十八年文公十七年齊桓公以兵破蔡遂伐楚至召陵二十四年文公之賤妾曰燕結夢天與之蘭曰余爲伯儵余爾祖也以是爲而子蘭有國香以夢告文公文公幸之而予之草蘭爲符遂生子名曰蘭三十六年晉公子重耳過文公弗禮文公弟叔詹曰重耳賢又且同姓窮而過君不可無禮文公曰諸侯亡公子過者多矣安能盡禮之詹曰君

如弗禮遂殺之弗殺使卽反國爲鄭憂矣文公弗聽三十七年春晉公子重耳反國立是爲文公秋鄭入滑滑聽命已而反與衛於是鄭伐滑周襄王使伯榘請滑鄭文公怨惠王之亡在櫟而文公之父厲公入之而不賜厲公爵祿又怨襄王之與衛滑故不聽襄王請而囚伯榘王怒與翟人伐鄭弗克冬翟攻伐襄王襄王出奔鄭鄭文公居王于汜三十八年晉文公入襄王成周四十一年助楚擊晉自晉文公之過無禮故背晉助楚四十二年晉文公與秦繆公共圍鄭討其助楚攻晉者及文公之過無禮也初鄭文公有三夫人寵子五人皆以罪蚤死公怒漑逐羣公子子蘭奔晉從晉文公圍鄭時蘭事晉文公甚謹愛幸之乃私於晉以求入鄭爲太子晉於是欲得叔詹爲僂鄭文公恐不敢謂叔詹言詹聞言於鄭君曰臣謂君君不聽臣晉卒爲患然晉所以圍鄭以詹詹死而赦鄭國詹之願也乃自殺鄭人以詹尸與晉晉文公曰必欲一見鄭君辱之而去鄭人患之乃使人私於秦曰破鄭益晉非秦之利也秦兵罷晉文公欲入蘭爲太子以告鄭鄭大夫石癸曰吾聞姞姓乃后稷之元妃其後當有興者子蘭母其後也且夫人子盡已死餘庶子無如蘭賢今圍急晉以爲請利孰大焉遂許

通志

卷七

周同姓世家一

七

晉與盟而立蘭爲太子晉兵乃罷去四十五年文公卒子蘭立是爲繆公繆公元年春秦繆公使三將將兵欲襲鄭至滑逢鄭賈人弦高詐以十二牛勞軍故秦兵不至而還晉敗之於穀初往年鄭文公之卒也鄭司城繪賀以鄭情賣之秦兵故來三年鄭發兵從晉伐秦敗秦兵於注往年楚太子商臣弑其父成王代立二十一年與宋華元伐鄭華元殺羊食士不與其御羊斟怒以馳鄭鄭囚華元宋贖華元元亦亡去晉使趙穿以兵伐鄭二十二年鄭繆公卒子夷立是爲靈公靈公元年春楚獻鼃於靈公子家子公將朝靈公子公之食指動謂子

通志

卷七

周同姓世家一

五

家曰他日指動必食異物及入見靈公進鼃羹子公笑曰果然靈公問其笑故具告靈公靈公召之獨弗予羹子公怒染其指嘗之而出公怒欲殺子公子公與子家謀先夏弑靈公鄭人欲立靈公弟去疾去疾讓曰必以賢則去疾不肖必以順則公子堅長堅者靈公庶弟去疾之兄也於是乃立子堅是爲襄公襄公立將盡去繆氏繆氏者殺靈公子公之族家也去疾曰必去繆氏我將去之乃止皆以爲大夫襄公元年楚復伐鄭晉來救之六年子家卒國人復逐其族以其弑靈公也七年鄭與晉

盟鄆陵八年楚莊王以鄭與晉盟來伐圍鄭三月鄭以城降楚楚王入自皇門鄭襄公肉袒牽羊以迎曰孤不能事邊邑使君王懷怒以及弊邑孤之罪也敢不唯命是聽君王遷之江南及以賜諸侯亦唯命是聽若君王不忘厲宣王桓武公哀不忍絕其社稷錫不毛之地使復得改事君王孤之願也然非所敢望也敢布腹心唯命是聽莊王爲却三十里而後舍楚羣臣曰自郢至此士夫亦久勞矣今得國舍之何如莊王曰所爲伐伐不服也今已服尙何求乎卒去晉聞楚之伐鄭發兵救鄭其來持兩端故遲比至河楚兵已去晉將率或欲渡河或欲還卒渡河莊王聞還擊晉鄭反助楚大破晉軍於河上十年晉來伐鄭以其反晉而親楚也十一年楚莊王伐宋宋告急于晉晉景公使勇士解揚告宋令無降楚過鄭鄭與楚親執解揚獻之楚楚王厚賜解揚與約使反其言解揚許之登諸樓車解揚大呼宋人致晉君命楚王怒將殺解揚旣而赦之語具解揚傳中十八年襄公卒子悼公潰立悼公元年鄆公惡鄭於楚悼公使弟論於楚自訟訟不直楚囚論於是鄭悼公來與晉平遂親論私於楚子反子反言歸論於鄭二年楚伐鄭晉兵來救是歲悼公卒立其弟論是爲成公成公三年楚

通志

卷五

周同姓世家一

五

共王曰鄭成公孤有德焉使人來與盟成公私與盟秋成公朝晉晉曰鄭私平於楚執之使欒書伐鄭四年春鄭患晉圍公子如乃立成公庶兄繻爲君其四月晉聞鄭立君乃歸成公鄭人聞成公歸亦殺君繻迎成公晉兵去十年背晉盟盟於楚晉厲公怒發兵伐鄭楚共王救鄭晉楚戰鄢陵楚兵敗晉射傷共王日俱罷而去十三年晉悼公伐鄭兵於洧上鄭城守晉亦去十四年成公卒子渾立是爲釐公釐公五年鄭相子駟朝釐公釐公不禮子駟怒使廚人藥殺釐公赴諸侯曰釐公暴病卒立釐公子嘉嘉時年五歲是爲簡公簡公元年諸公

通志

卷七

周同姓世家一

七

子謀欲誅相子駟子駟覺之反盡誅諸公子二年晉伐鄭鄭與盟晉去冬又與楚盟子駟畏誅故兩親晉楚三年相子駟欲自立爲君公子孔使尉止殺子駟而代之子孔又欲自立子產曰子駟爲不可誅之今又效之是亂無時息也於是子孔從之而相鄭鄭簡公四年晉怒鄭與楚盟伐鄭鄭與盟楚共王救鄭敗晉兵簡公欲與晉平楚又囚鄭使者十二年簡公怒相子孔專國權誅之而以子產爲卿十九年簡公如晉請衛君還而封子產以六邑子產讓受其半二十二年吳使延陵季子於鄭見子產如舊交謂子產曰鄭之執政者侈難將至政

將及子子爲政必以禮不然鄭將敗子產厚遇季子二十三年諸公子爭寵相殺又欲殺子產公子或諫曰子產仁人鄭所以存者子產也勿殺乃止二十五年鄭使子產於晉問平公疾平公曰卜而曰實沈臺駘爲祟史官莫知敢問對曰高辛氏有二子季曰實沈主參參爲晉星則實沈參神也金天氏有裔孫曰臺駘主宣汾洮則臺駘汾洮神也然此二者山川之神水旱是司不害君身若君疾抑飲食哀樂女色之所由致也平公及叔嚮曰博物君子也厚爲之禮語具子產傳中二十七年

夏鄭簡公朝晉冬畏楚靈王之彊又朝楚子產從二十

通志

卷七

周同姓世家一

七

八年鄭君病使子產會諸侯與楚靈王盟於申誅齊慶封三十六年簡公卒子定公寧立秋定公朝晉昭公定公元年楚公子棄疾弑其君靈王而自立爲平王欲行德諸侯歸靈王所侵鄭地于鄭四年晉昭公卒其六卿彊公室卑子產謂韓宣子曰爲政必以德毋忘所以立六年鄭火公欲禳之子產曰不如修德八年楚太子建來奔十年太子建與晉謀襲鄭鄭殺建建子勝奔吳十一年定公如晉晉與鄭謀誅周亂臣入敬王于周十六年定公卒子獻公蠆立獻公十三年卒子聲公勝立當是時晉六卿彊侵奪鄭鄭遂弱聲公五年鄭相子產卒

鄭人皆哭泣悲之如亡親戚子產者鄭成公少子也爲人仁愛人事君忠厚孔子嘗過鄭與子產如兄弟云及聞子產死孔子爲泣曰古之遺愛也兄事子產八年晉范中行氏反晉告急於鄭鄭救之晉伐鄭敗鄭軍於鐵十四年宋景公滅曹二十年齊田恆弑其君簡而恆相於齊二十二年楚惠王滅陳孔子卒二十六年晉知伯伐鄭取九邑三十七年聲公卒子哀公易立哀公八年鄭人弑哀公而立聲公弟丑是爲公共公三年晉滅知伯三十年共公卒子幽公已立幽公元年韓武子伐鄭殺幽公鄭人立幽公弟駘是爲繻公繻公十五年韓景侯伐鄭取雍邱鄭城京十六年鄭伐韓敗韓兵於負黍二十年韓趙魏列爲諸侯二十三年鄭圍韓之陽翟二十五年鄭君殺其相子陽二十七年子陽之黨共弑繻公駘而立幽公弟乙爲君是爲鄭君鄭君乙立二年鄭負黍反復歸韓十一年韓伐鄭取陽城二十一年韓哀侯滅鄭并其國

魏

魏之先畢公高之後也畢公高與周同姓武王之伐紂而高封於畢於是爲畢姓其後絕封爲庶人或在中國或在夷狄其苗裔曰畢萬事晉獻公獻公之十六年趙

通志

卷五

周同姓世家一

五

夙爲御畢萬爲右以伐霍耿魏滅之以耿封趙夙以魏封畢萬爲大夫卜偃曰畢萬之後必大矣萬盈數也魏大名也以是始賞天啓之矣天子曰兆民諸侯曰萬民今命之大以從盈數其必有衆初畢萬卜事晉遇屯之比辛廖占之曰吉屯固比入吉孰大焉其必蕃昌畢萬封十一年晉獻公卒四子爭更立晉亂而畢萬之世彌大從其國名爲魏氏生武子魏武子以魏諸子事晉公子重耳晉獻公之二十一年武子從重耳出亡十九年反重耳立爲晉文公而令魏武子襲魏氏之後封列爲大夫治於魏生悼子魏悼子徙治霍生魏絳魏絳事晉

通志

卷七

周同姓世家一

七

悼公悼公三年會諸侯悼公弟揚于亂行魏絳僂辱揚于悼公怒曰合諸侯以爲榮今辱吾弟將誅魏絳或說悼公悼公止卒任魏絳政使和戎翟戎翟親附悼公之十一年曰自吾用魏絳八年之中九合諸侯戎翟和子之力也賜之樂三讓然後受之徙治安邑魏絳卒諡爲昭子生魏嬴嬴生魏獻子獻子事晉昭公昭公卒而六卿彊公室卑晉頃公之十二年韓宣子老魏獻子爲國政晉宗室祁氏羊舌氏相惡六卿誅之盡取其邑爲十縣六卿各令其子爲之大夫獻子與趙簡子中行文子范獻子竝爲晉卿其後十四歲而孔子相魯後四歲趙

簡子以晉陽之亂也而與韓魏共攻范中行氏魏獻子  
生魏侈魏侈與趙鞅共攻范中行氏魏侈之孫曰魏桓  
子與韓康子趙襄子共伐滅知伯分其地桓子之孫曰  
文侯都魏文侯元年秦靈公之元年也與韓武子趙桓  
子周威王同時六年城少梁十三年使子擊圍繁龐出  
其民十六年伐秦築臨晉元里十七年伐中山使子擊  
守之趙倉唐傅之子擊逢文侯之師田子方於朝歌引  
車避下謁田子方不爲禮子擊因問曰富貴者驕人乎  
且貧賤者驕人乎子方曰亦貧賤者驕人耳夫諸侯而  
驕人則失其國大夫而驕人則失其家貧賤者行不合

通志

卷七

周同姓世家一

七

言不用則去之楚越若脫躡然奈何其同之哉子擊不  
憚而去西攻秦至鄭而還築洛陰合陽二十二年魏趙  
韓列爲諸侯二十四年秦伐我至陽狐二十五年子擊  
生子罃文侯受子夏經藝客段干木過其閭未嘗不軾  
也秦嘗欲伐魏或曰魏君賢人是禮國人稱仁上下和  
合未可圖也文侯由此得譽於諸侯任西門豹守鄴而  
河內稱治魏文侯謂李克曰先生嘗教寡人曰家貧則  
思良妻國亂則思良相今所置非成則璜二子何如李  
克對曰臣聞卑不謀尊疏不謀戚臣在關門之外不敢  
當命文侯曰先生臨事勿讓李克曰君不察故也居視

其所親富視其所與達視其所舉窮視其所不爲貧視其所不取五者足以定之矣何待克哉文侯曰先生就舍寡人之相定矣李克趨而出過翟璜之家翟璜曰今者聞君召先生而卜相果誰爲之克曰魏成子爲相矣翟璜忿然作色曰以耳目之所親記臣何負於魏成子西河之守臣之所進也君內以鄴爲憂臣進西門豹君謀伐中山臣進樂羊中山已拔無使守之臣進先生君之子無傅臣進屈侯鮒臣何以負於魏成子李克曰且子之言克於子之君者豈將比周以求大官哉君問而置相非成則璜二子何如克對曰君不察故也居視其所親富視其所與達視其所舉窮視其所不爲貧視其所不取五者足以定之矣何待克哉是以知魏成子之爲相也且子安得與魏成子比乎魏成子以食祿千鍾什九在外什一在內是以東得卜子夏田子方段干木此三人者君皆師之子之所進五人者君皆臣之子惡得與魏成子比也翟璜遂巡再拜曰璜鄙人也失對願卒爲弟子二十六年虢山崩壅河三十二年伐鄭城酸棗敗秦于注三十五年齊伐取我襄陵三十六年秦侵我陰晉三十八年伐秦敗我武下得其將讖是歲文侯卒子擊立是爲武侯武侯元年趙敬侯初立公子朔爲

通志

卷七

周同姓世家一

五

亂不勝奔魏與魏襲邯鄲魏敗而去二年城安邑王垣  
七年伐齊至桑邱九年翟敗我于澮使吳起伐齊至靈  
邱齊威王初立十一年與韓趙三分晉地滅其後十三  
年秦獻公縣櫟陽十五年敗趙北蔭十六年伐楚取魯  
陽武侯卒子營立是爲惠王惠王元年初武侯卒也子  
營與公中緩爭爲太子公孫頎自宋入趙自趙入韓謂  
韓懿侯曰魏營與公中緩爭爲太子君亦聞之乎今魏  
營得王錯挾上黨固半國也因而除之破魏必矣不可  
失也懿侯說乃與趙成侯合軍并兵以伐魏戰於濁澤

魏氏大敗魏君圍趙謂韓曰除魏君立公中緩割地而

通志

卷七

周同姓世家一

七

退我且利韓曰不可殺魏君人必曰暴割地而退人必  
曰貪不如兩分之魏分爲兩不彊於宋衛則我終無魏  
之患矣趙不聽韓不說以其少卒夜去惠王之所以身  
不死國不分者二家謀不和也若從一家之謀則魏必  
分矣故曰君終無適子其國可破也二年魏敗韓于馬  
陵敗趙于懷三年齊敗我觀五年與韓會宅陽城武堵  
爲秦所敗六年伐取宋儀臺九年伐敗韓于澮與秦戰  
少梁虜我將公孫座取龐秦獻公卒子孝公立十年伐  
取趙皮牢彗星見十二年星晝墜有聲十四年與趙會  
鄆十五年魯衛宋鄭君來朝十六年與秦孝公會社平

侵宋黃池宋復取之十七年與秦戰元里秦取我少梁  
圍趙邯鄲十八年拔邯鄲趙請救于齊齊使田忌孫臏  
救趙敗魏桂陵十九年諸侯圍我襄陵築長城塞固陽  
二十年歸趙邯鄲與盟漳水上二十一年與秦會彤趙  
成侯卒二十八年齊威王卒中山君相魏三十年魏伐  
趙趙告急齊齊宣王用孫子計救趙擊魏魏遂大興師  
使龐涓將而令太子申爲上將軍過外黃外黃徐子謂  
太子曰臣有百戰百勝之術太子曰可得聞乎客曰固  
願效之曰太子自將攻齊大勝并莒則富不過有魏貴  
不益爲王若戰不勝齊則萬世無魏矣此臣之百戰百

通志

卷五

周同姓世家一

空

勝之術也太子曰諾請必從公之言而還矣客曰太子  
雖欲還不得矣彼勸太子戰攻欲啜汁者衆太子雖欲  
還恐不得矣太子因欲還其御曰將出而還與北同太  
子果與齊人戰敗於馬陵齊虜魏太子申殺將軍涓軍  
遂大破三十一年秦趙齊共伐我秦將商君詳我將軍  
公子卬而襲奪其軍破之秦用商君東地至河而齊趙  
數破我安邑近秦於是徙治大梁以公子赫爲太子三  
十三年秦孝公卒商君亡秦歸魏魏怒不入三十五年  
與齊宣王會平阿南惠王數被於軍旅卑禮厚幣以招  
賢者於是鄒衍淳于髡孟軻皆至梁惠王曰寡人不佞

兵三折於外太子虜上將死國以空虛以羞先君宗廟社稷寡人甚醜之叟不遠千里辱幸至弊邑之廷將何以利吾國孟軻曰君不可以言利若是夫君欲利則大夫欲利大夫欲利則庶人欲利上下爭利國則危矣爲人君仁義而已矣何以利爲三十六年復與齊王會甄其歲惠王卒子襄王立襄王元年與諸侯會徐州相王也追尊父惠王爲王五年秦敗我龍賈軍四萬五千于雕陰圍我焦曲沃予秦河西之地六年與秦會應秦取我汾陰皮氏焦魏伐楚敗之陘山七年魏盡入上郡于

秦秦降我蒲陽八年秦歸我焦曲沃十二年楚敗我襄

通志

卷七

周同姓世家一

三

陵諸侯執政與秦相張儀會齧桑十三年張儀相魏魏有女子化爲丈夫秦取我曲沃平周十六年襄王卒子哀王立張儀復歸秦哀王元年五國共攻秦不勝而去二年齊敗我觀津五年秦使樗里子伐取我曲沃走犀首岸門六年秦求立公子政爲太子與秦會臨晉七年攻齊與秦伐燕八年伐衛拔列城二衛君忠之如耳見衛君曰請罷魏兵免成陵君可乎衛君曰先生果能孤請世世以衛事先生如耳見成陵君曰昔者魏伐趙斷羊腸拔閼與約斬趙趙分而爲二所以不亡者魏爲從主也今衛已迫亡將西請事於秦與其以秦驛衛不如

以魏醜衛衛之德魏終必無窮成陵君曰諾如耳見魏  
王曰臣有謁於衛衛故周室之別也其稱小國多寶器  
今國迫於難而寶器不出者其心以爲攻衛醜衛不以  
王爲主故寶器雖出必不入於王也臣竊料之先言醜  
衛者必受衛者也如耳出成陵君入以其言見魏王魏  
王聽其說免成陵君終身不見九年與秦王會臨晉張  
儀魏章皆歸于魏魏相田需死楚害張儀犀首薛公楚  
相昭魚謂蘇代曰田需死吾恐張儀犀首薛公有一人  
相魏者也代曰然相者欲誰而君便之昭魚曰吾欲太  
子之自相也代曰請爲君北必相之昭魚曰奈何對曰

通志

卷五

周同姓世家一

三

君其爲梁王代請說君昭魚曰奈何對曰代也從楚來  
昭魚甚憂曰田需死吾恐張儀犀首薛公有一人相魏  
者也代曰梁王長主也必不相張儀張儀相必右秦而  
左魏犀首相必右韓而左魏薛公相必右齊而左魏梁  
王長主也必不便也王曰然則寡人孰相代曰莫若太  
子之自相太子之自相是三人者皆以爲太子爲非常  
相也皆將務以其國事魏欲得丞相璽也以魏之疆而  
王萬乘之國輔之魏必安矣故曰莫若太子之自相也  
遂北見梁王以此告之太子果相魏十年張儀死十一  
年與秦武王會應十二年太子朝於秦秦來伐我皮氏

未拔而解十四年秦來歸武王后十六年秦拔我蒲阪  
陽晉封陵十七年與秦會臨晉秦予我蒲阪十八年與  
秦伐楚二十一年與齊韓共敗秦軍函谷二十三年秦  
復予我河外及封陵爲和哀王卒子昭王立昭王元年  
秦拔我襄城二年與秦戰我不利三年佐韓攻秦秦將  
白起敗我軍伊闕二十四萬六年予秦河東地方四百  
里芒秦以詐重七年秦拔我城大小六十一八年秦昭  
王爲西帝齊湣王爲東帝月餘皆復稱王歸帝九年秦  
拔我新垣曲陽之城十年齊滅宋宋王死我温十二年  
與秦趙韓燕共伐齊敗之濟西湣王出亡燕獨入臨菑

通志

卷七

周同姓世家一

七

與秦王會西周十三年秦拔我安城兵到大梁去十八  
年秦拔郢楚王徙陳十九年昭王卒子安釐王立安釐  
王元年秦拔我兩城二年又拔我二城軍大梁下韓來  
救予秦温以和三年秦拔我四城斬首四萬四年秦破  
我及韓趙殺十五萬人走我將芒卯魏將段子子請予  
秦南陽以和蘇代謂魏王曰欲璽者段子子也欲地者  
秦也今王使欲地者制璽使欲璽者制地魏氏地不盡  
則不知己且夫以地事秦譬猶抱薪救火薪不盡火不  
滅王曰是則然也雖然事始已行不可更矣對曰王獨  
不見夫博之所其貴梟者便則食不便則止矣今王曰

事始已行不可更是何王之用智不如用臬也九年秦拔我懷十年秦太子外質於魏死十一年秦拔我鄆卹秦昭王謂左右曰今時韓魏與始孰彊對曰不如始彊

王曰今時如耳

耳魏將

魏齊與孟嘗芒卯孰賢對曰不如

王曰以孟嘗芒卯之賢率彊韓魏以攻秦猶無奈寡人何也今以無能之如耳魏齊而率弱韓魏以伐秦其無奈寡人何亦明矣左右皆曰甚然中旗馮琴對曰王之料天下過矣當晉六卿之時知氏最彊滅范中行又率韓魏之兵以圍趙襄子於晉陽決晉水以灌晉陽之城不湛者三版知伯行水魏桓子御韓康子爲驂乘知伯

通志

卷七

周同姓世家一

金

曰吾始不知水之可以亡人之國也乃今知之汾水可以灌安邑絳水可以灌平陽魏桓子肘韓康子韓康子履魏桓子肘足接於車上而知氏地分身死國亡爲天下笑今秦雖彊不能過知氏韓魏雖弱尙賢其在晉陽之下也此方其用肘足之詩也願王之必勿易也於是秦王恐齊楚相約而攻魏魏使人求救於秦冠蓋相望也而秦救不至魏人有唐睢者年九十餘矣謂魏王曰老臣請西說秦王令兵先臣出魏王再拜遂約車而遣之唐睢到入見秦王秦王曰丈人芒然乃遠至此甚苦矣夫魏之來求救數矣寡人知魏之急已唐睢對曰大

王已知魏之急而救不發者臣竊以爲用策之臣無任矣夫魏一萬乘之國也然所以西面而事秦稱東藩受冠帶祠春秋者以秦之疆足以爲與也今楚齊之兵已合於魏郊矣而秦救不發亦將賴其未急也使之大急彼且割地而約從王尙奚救焉必待其急而救之是失一東藩之魏而疆二敵之齊楚則王何利焉於是秦昭王遽爲發兵救魏魏復定趙使人謂魏王曰爲我殺范痤吾請獻七十里之地魏王曰諾使吏捕之圍而未殺痤因上屋騎危

危棟上也

謂使者曰與其以死痤市不如以

生痤市有如痤死趙不與王地則王將奈何故不若與

通志

卷七

周同姓世家一

矣

先定割地然後殺痤魏王曰善痤因上書信陵君曰痤故魏之免相也趙以地殺痤而魏王聽之有如彊秦亦將襲趙之欲則君且奈何信陵君言於王而出之魏王以秦救之故欲親秦而伐韓以求故地無忌謂魏王曰秦與戎翟同俗有虎狼之心貪戾好利無信不識禮義德行苟有利焉不顧親戚兄弟若禽獸耳此天下之所識也非有所施厚積德也故太后母也而以憂死穰侯舅也功莫大焉而竟逐之兩弟無罪而再奪之國此於親戚若此而況於仇讎之國乎今王與秦共伐韓而益近秦患臣甚惑之而王不識則不明羣臣莫以聞則不

忠今韓氏以一女子奉一弱主內有大亂外交彊秦魏之兵王以爲不亡乎韓亡秦有鄭地與大梁鄰王以爲安乎王欲得故地今負彊秦之親王以爲利乎秦非無事之國也韓亡之後必將更事更事必就易與利就易與利必不伐楚與趙矣是何也夫越山逾河絕韓上黨而攻彊趙是復闕與之事秦必不爲也若道河內倍鄴朝歌絕漳溢水與趙兵決於邯鄲之郊是知伯之禍也秦又不敢伐楚道涉山谷行三千里而攻冥阨之塞所行甚遠所攻甚難秦又不爲也若道河外倍大梁右蔡

左召陵與楚兵決於陳郊秦又不敢故曰秦必不伐楚

通志

卷七

周同姓世家一

七

與趙矣又不攻衛與齊矣夫韓亡之後兵出之日非魏無攻已秦固有懷茅邢邱城埭津以臨河內河內共汲必危有鄭地得垣雍決滎澤水灌大梁大梁必亡王之使者出過而惡安陵氏於秦秦之欲誅之久矣秦葉陽昆陽與舞陽鄰聽使者之惡之隨安陵氏而亡之繞舞陽之北以東臨許南國必危國無害已夫憎韓不愛安陵氏可也夫不忠秦之不愛南國非也異日者秦在河西晉國去梁千里有河山以闌之有周韓以閒之從林鄉軍以至于今秦七攻魏五入圃中邊城盡拔文臺墮垂都焚林木伐麋鹿盡而國繼以圍又長驅梁北東至

陶衛之郊北至平監所亡於秦者山南山北河外河內大縣數十名都數百秦乃在河西晉去梁千里而禍若是矣又況於秦無韓有鄭地無河山而闌之無周韓而閔之去大梁百里禍必由此矣異日者從之不成也楚魏疑而韓不可得也今韓受兵三年秦撓之以講識亡不聽投質於趙請爲天下鴈行頓刃楚趙必集兵皆識秦之欲無窮也非盡亡天下之國而臣海內必不休矣是故臣願以從事王王速受楚趙之約趙挾韓之質以存韓而求故地韓必效之此士民不勞而故地得其功多於與秦共伐韓而又與彊秦鄰之禍也夫存韓安魏而利天下此亦王之天時已通韓上黨於共甯使道安成出入賦之是魏重質韓以其上黨也今有其賦足以富國韓必德魏愛魏重魏畏魏韓必不敢反魏是韓則魏之縣也魏得韓以爲縣衛大梁河外必安矣今不存韓二周安陵必危楚趙大破衛齊甚畏天下西鄉而馳秦入韓而爲臣不久矣二十年秦圍邯鄲信陵君無忌矯奪將軍晉鄙兵以救趙趙得全無忌因畱趙二十六年秦昭王卒三十年無忌歸魏率五國兵攻秦敗之河外走蒙鶩魏太子增質於秦秦怒欲囚魏太子增或爲增謂秦王曰公孫喜固謂魏相曰請以魏疾擊秦秦王

通志

卷五

周同姓世家一

六

怒必囚增魏王又怒擊秦秦必傷今王囚增是喜之計中也故不若貴增而合魏以疑之於齊韓秦乃止增三十一年秦王政初立三十四年安釐王卒太子增立是爲景湣王信陵君無忌卒景湣王元年秦拔我二十城以爲秦東郡二年拔我朝歌衛徙野王三年秦拔我汲五年秦拔我垣蒲陽衍十五年景湣王卒子王假立王假元年燕太子丹使荆軻刺秦王秦王覺之二年秦灌大梁虜王假遂滅魏以爲郡縣

### 韓

韓之先與周同姓姬氏其後苗裔事晉得封於韓國

通志

卷七

周同姓世家一

完

曰韓武子武子後三世有韓厥從封姓爲韓氏韓厥晉景公之三年晉司寇屠岸賈將作亂誅靈公之賊趙盾趙盾已死矣欲誅其子趙朔韓厥止賈賈不聽厥告趙朔令亡朔曰子必能不絕趙祀死不恨矣韓厥許之及賈誅趙氏厥稱疾不出程嬰公孫杵臼之藏趙孤趙武也厥知之景公十一年厥與郤克將兵八百乘伐齊敗頃公子鞏獲逢丑父於是晉作六卿而韓厥在一卿之位號爲獻子晉景公十七年病卜大業之不遂者爲祟韓厥稱趙成季之功今後無祀以感景公景公問曰尙有世乎厥於是言趙武而復與故趙氏田邑續趙氏祀

晉悼公之十年韓獻子老獻子卒子宣子代宣子徙居  
州晉平公十四年吳李札使晉曰晉國之政卒歸於韓  
魏趙矣晉頃公十二年韓宣子與趙簡此侵伐范中行氏  
氏十縣晉定公十五年宣子與趙簡此侵伐范中行氏  
宣子卒子貞子代立貞子徙居平陽貞子卒子閒子代  
簡子卒子莊子代莊子卒子康子代康子與趙屬子魏  
桓子共敗知伯分其地益大大於諸侯康子卒子武  
子伐武子二年伐鄭殺其君幽公十六年武子卒子景  
侯立景侯虔元年伐鄭取雍邱二年鄭敗我負黍六年  
與趙魏俱得列爲諸侯九年鄭圍我陽翟景侯卒子烈

通志

卷七

周同姓世家一

七

侯立烈侯三年聶政殺韓相俠累九年秦伐我宜陽取  
六邑十三年烈侯卒子文侯立是歲魏文侯卒文侯二  
年伐鄭取陽城伐宋到彭城執宋君七年伐齊至桑邱  
鄭反晉九年代齊至靈邱十年文侯卒子哀侯立哀侯  
元年與趙魏分晉國二年滅鄭因徙都鄭六年韓嚴弑  
其君哀侯而子懿侯立懿侯二年魏敗我馬陵五年與  
魏惠王會宅陽九年魏敗我澮十二年懿侯卒子昭侯  
立昭侯元年秦敗我西山二年宋取我黃池魏取朱六  
年伐東周取陵觀邢邱八年申不害相韓修術行道國  
內以治諸侯不來侵伐十年韓姬弑其君悼公十一年

昭侯如秦二十二年申不害死二十四年秦來拔我宜陽二十五年旱作高門屈宜臼曰昭侯不出此門何也不時吾所謂時者非時日也人固有利不利時昭侯嘗利矣不作高門往年秦拔宜陽今年旱昭侯不以此時卹民之急而顧益奢此謂時黜舉羸二十六年高門成昭侯卒果不出此門子宣惠王立宣惠王五年張儀相秦八年魏敗我韓舉十一年君號爲王與趙會區鼠十四年秦伐敗我鄆十六年秦敗我修魚虜得韓將鯁申差於濁澤韓氏急公仲謂韓王曰與國非可恃也今秦之欲伐楚久矣王不如因張儀爲和於秦賂以一名都

通志

卷七

周同姓世家一

七

具甲與之南伐楚此以一易二之計也韓王曰善乃警公仲之行將西購於秦楚王聞之大恐召陳軫告之陳軫曰秦之欲伐楚久矣今又得韓之名都一而具甲秦韓并兵而伐楚此秦所禱祀而求也今已得之矣楚國必伐矣王聽臣爲之警四境之內起師言救韓命戰車滿道路發信臣多其車重其幣使信王之救已也縱韓不能聽我韓必德王也必不爲鴈行以來是秦韓不和也兵雖至楚不大病也爲能聽我絕和於秦秦必大怒以厚怨韓之南交楚必輕秦輕秦其應秦必不敬是因秦韓之兵而免楚國之患也楚王曰善乃警四境之內

興師言救韓命戰車滿道路發信臣多其車重其幣謂韓王曰不穀國雖小已悉發之矣願大國遂肆志於秦不穀將以楚徇韓韓王聞之大說乃止公仲之行公仲曰不可夫以實伐我者秦也以虛名救我者楚也王恃楚之虛名而輕絕彊秦之敵王必爲天下笑且楚韓非兄弟之國也又非素約而謀伐秦也已有伐形因發兵言救韓此必陳軫之謀也且王已使人報於秦矣今不行是欺秦也夫輕欺彊秦而信楚之謀臣恐王必悔之韓王不聽遂絕於秦秦因大怒益甲伐韓大戰楚救不至韓十九年大破我岸門太子倉質於秦以和二十一

通志

卷五

周同姓世家一

三

年與秦共攻楚敗楚將屈丐斬首八萬於丹陽是歲宣惠王卒太子倉立是爲襄王襄王四年與秦武王會臨晉其秋秦使甘茂攻我宜陽五年秦拔我宜陽斬首六萬秦武王卒六年秦復與我武遂九年秦復取我武遂十年太子嬰朝秦而歸十一年秦伐我取穰與秦伐楚敗楚將唐昧十二年太子嬰死公子咎公子蟣蝨爭爲太子時蟣蝨質於楚蘇代謂韓咎曰蟣蝨亡在楚楚王欲內之甚今楚兵十餘萬在方城之外公何不令楚王築萬室之都雍氏之旁韓必起兵以救之公必將矣公因以韓楚之兵奉蟣蝨而內之其聽公必矣必以楚韓

封公也韓咎從其計楚圍雍氏韓求救於秦秦未爲發使公孫昧入韓公仲日子以秦爲且救韓乎對曰秦王之言曰請道南鄭藍田出兵於楚以待公殆不合矣公仲日子以爲果乎對曰秦王必祖張儀之故智楚威王攻梁也張儀謂秦王曰與楚攻魏魏折而入於楚韓固其與國也是秦孤也不如出兵以到之魏楚大戰秦取西河之外以歸今其狀陽言與韓其實陰善楚公待秦而到必輕與楚戰楚陰得秦之不用也必易與公相支也公戰而勝楚遂與公乘楚弛三川而歸公戰不勝楚楚塞三川守之公不能救也竊爲公忠之司馬庚三反於郢甘茂與昭魚遇於商於其言收璽實類有約也公仲恐曰然則奈何曰公必先韓而後秦先身而後張儀公不如亟以國合於齊楚齊楚必委國於公公之所惡者張儀也其實猶不無秦也於是楚解雍氏圍蘇代又謂秦太后弟芊戎曰公叔伯嬰恐秦楚之內蟣蝨也公何不爲韓求質於楚楚王聽入質子於韓則公叔伯嬰知秦楚之不以蟣蝨爲事必以韓合於秦楚楚挾韓以窘魏魏氏不敢合於齊是齊孤也公又爲秦求質子於楚楚不聽怨結於韓韓挾齊魏以圍楚楚必重公公挾秦楚之重以積德於韓公叔伯嬰必以國待公於是

通志

卷七

周同姓世家一

七

蟣蝨竟不得歸韓韓立咎爲太子齊魏王來十四年與齊魏王共擊秦至函谷而軍焉十六年秦與我河外及武遂襄王卒太子咎立是爲釐王釐王三年使公孫喜率周魏攻秦秦敗我二十四萬虜喜伊闕五年秦拔我宛六年與秦武遂地二百里十年秦敗我師于夏山十二年與秦昭王會西周而佐秦攻齊齊敗湣王出亡十四年與秦會兩周閒二十一年使暴戴救魏爲秦所敗戴走開封二十三年趙魏攻我華陽韓告急於秦秦不救韓相國謂陳筮曰事急願公雖病爲一宿之行陳筮見穰侯穰侯曰事急乎故使公來陳筮曰未急也穰侯怒曰是可以爲公之主使乎夫冠蓋相望告敝邑甚急公來言未急何也陳筮曰彼韓急則變而他從以未急故復來耳穰侯曰公無見王請今發兵救韓八日而至敗趙魏於華陽之下是歲釐王卒子桓惠王立桓惠王元年伐燕九年秦拔我陘城汾旁十年秦擊我於太行我上黨郡守以上黨郡降趙十四年秦拔趙上黨殺馬服子卒四十餘萬於長平十七年秦拔我陽城負黍二十三年秦昭王卒二十四年秦拔我城臯滎陽二十六  
年秦悉拔我上黨二十九年秦拔我十三城三十四年桓惠王卒子王安立王安五年秦攻韓韓急使韓非使

通志

卷七

周同姓世家一

七

秦秦留非因殺之九年秦虜王安盡入其地爲潁川郡  
韓遂亡

通志



卷七

周同姓世家一

七



通志卷第七十七



